

YEMA CUÁÜ NÜXÜ DAUXÜ I YIXCÜRA TÁ NGUPETÜXÜCHIGA

Ore ga Cuáüxü nüxü nacuèxëxü ga Ngechuchu ga Cristu

¹ Ñaã nixĩ i ngẽma ore ga Tupana Ngechuchu ya Cristuxü nüxü cuèxëxü na nüxĩ norü duüxügüxü nüxü nacuèxëxücèx i ngẽma paxa tá ngupetüxü. Rü nüma ga Ngechuchu ya Cristu nixĩ ga norü orearü ngerüü ga daxücüãxü namuxü na norü duücü ga Cuáümaã nüxü na yaxuxücèx.

² Rü choma i Cuáü chixĩ ga aixcüma meãma nüxü chadauxü rü chanaxümatüxü ga guxüma ga yema Tupanaärü ore ga Ngechuchu chauxcèx ngoxëxü.

³ Rü tataãe ya yíxema duüxügüpëxewa nawa ngúxe i ñaã Tupanaärü ore, rü ngëxgumarüü ta tataãëgü ya yíxema nüxü ñnüëxë rü naga ñnüëxë i ñaã ore i ümatüxü, erü paxa tá ningü i ngẽma nüxü yaxuxü.

Cuáü nanaxümatü naxcèx ga yema 7 tücumü ga yaxögüxü ga Áchiaanewa yexmagüxü

⁴ Rü choma i Cuáü rü chanaxümatü i ñaã ore pexcèx i yaxögüxe ya yima 7 ya ñãne ya Áchiaarü naãnewa ngëxmagünewa ngëxmagüxe. Rü chanaxwèxe i pexü narüngüxëe rü pexü nataãëxëe ya yima Tupana ya woetama ngëxmaëchacü. Rü ngëxgumarüü ta chanaxwèxe i pexü narüngüxëe rü pexü nataãëxëe i ngẽma Naãe i Üünexü i naxütawa

ne ùxũ i perũ dauruũ ixĩxũ i pema i yaxõgũxe ya yima 7 ya ãñewa na pengẽxmagũxũ.

⁵ Rũ ngẽxgumarũũ ta chanaxwèxe na pexũ nangũxẽxũ rũ pexũ nataãxẽxũ ya Ngechuchu ya Cristu ga aixcũma meãma nũxũ ixucũ ga Tupanaãrũ ore ga ñoma ga naãnewa. Rũ nũma nixĩ ga nũxĩra yuwa ínadxũ. Rũ nũma rũ guxũma i ñoma i naãnewa ngẽxmagũxũ i nachiuãneãrũ ãẽxgacũgũarũ ãẽxgacũ nixĩ. Rũ nũma rũ tũxũ nangechaũ, rũ nagũmaã tũxũ inayanaxoxẽe i tórũ pecadugũ.

⁶ Rũ ñuxma na guxũãrũ ãẽxgacũ yĩxũ i nũmax, rũ tũxũ naxũchica i ngextá nũma ãẽxgacũ íyĩxũwa. Rũ paigũxũ tũxũ nixĩgũxẽe na Nanatũ ya Tupanaãxũ ipuracũexũcèx rũ nũxũ icuèxũũgũxũcèx. Rũ name nixĩ i guxũgutáma Cristuxũ ticuèxũũgũ, erũ nũma rũ guxũgutáma guxũãrũ ãẽxgacũ nixĩ. Rũ ngẽmaãcũ yĩ.

⁷ ¡Rũ dũcax, marũ ningaica na caixanexũgu ínanguxũ ya Cristu! Rũ guxũtáma i duũxũgũ nũxũ nadau, rũ woo ga yema nacanapacũtũũgũxũ rũ tá ta nũxũ nadaugũ. Rũ guxũ i duũxũgũ i guxũ i nachiuãnecũãx i tama yaxõgũxũ rũ norũ muũmaã rũ norũ ngechaũmaã tá naxauxe i ngẽxguma ínanguxgu i nũmax. Rũ aixcũma ngẽmaãcũ tá nixĩ.

⁸ Rũ nũma ya tórũ Cori ya Tupana ya guxũãrũ ãẽxgacũ ixĩcũ ya woetama ngẽxmaẽchacũ, rũ ñanagũrũ:

“Chowa nixĩ ga inaxũgũxũ ga guxũma, rũ nataxuma i tacũ i chorũ yexera ngẽxmaẽchaxũ”, ñanagũrũ.

Cuãũcèx nangõx ga Cristu ya mexẽchicũ

9 Rū choma i Cuáũ na pexcèx chanaxümatüxũ i ñaã popera, rü peeneẽ chixĩ. Rū ngẽma na Ngechuchuna na chaxüxũ rü chaxãchica i ngextá nũma ãẽxgacü íyĩxũwa. Rū Ngechuchucèx pexrũ ngúxũ chinge, natürü nũma pexũ naporaexẽxürü choxũ naporaxẽẽ na yaxna namaã chaxĩnũxcèx i guxũma i ngẽma ngúxũ i choxũ üpetüxũ. Rū choma rü capaxũ ga Pátmuğu chapoxcu naxcèx na nüxũ chixuxũ ga Tupanaãrũ ore ga Ngechuchuchiga.

10-11 Rū wüxi ga yüxüarü ngunexügu rü Tupanaãẽ i Üünexũ chomaã inacuèx, rü changoxetü rü choweama nüxũ chaxĩnü ga wüxi ga naga ga tagaxũ ga ñoma cornetagarũ ixĩxũ ga ñaxũ choxũ:

“Chowa nixĩ ga inaxügüxũ ga guxũma, rü nataxuma i tacü i chorü yexera ngẽxmaẽchaxũ. Rū ñuxma chanaxwèxe na wüxi i poperagu cunaxümatüxũ i ngẽma nüxũ cudauxũ. Rū ñuxũchi chanaxwèxe i ngẽma yaxögüxũ ya yima 7 ya ããne ya Áchiaarü naãnewa ngẽxmagünewa ngẽxmagüxütanüwa cunamu. Rū yima 7 ya ããne nixĩ ya Epéchiu rü Esmira rü Pérgamu, rü Tiatíra rü Chardi rü Firadérfia rü Laodichéa”, ñanagürü.

12 Rū chaugü íchidau na nüxũ chacuáxücèx na tacü yĩxũ ga yema chomaã idexaxũ. Rū yexguma chaugü íchidèuxgu rü nüxũ chadau ga 7 ga weraarü üruüğü ga uirunaxcèx ixĩgüxũ.

13 Rū yema 7 ga weraarü üruüğüarü ngãxütanüwa nüxũ chadau ga wüxi ga duüxũ ga chauxcèx nangechuchu ga duüxüxũ ixĩcürãxũ. Rū wüxi ga naxchiru ga máxũmaã naxãxchiru. Rū wüxi ga goyexũ ga uirunaxcèxmaã nigoyeremü.

14 Rū nayae rū nachoxochi ñoma tacü i choxochixürüü. Rū naxētü rü ñoma üxüemarüü niyauracüü.

15 Rū nacutü rü ta niyauracüü ñoma cobrexüchi i meâma ípixürüü. Rū yexguma yadexagu rü nata-gaxüchi ñoma taxü i dexá i chuxchuxü ägaxürüü.

16 Rū norü tügünemëxëwa nüxü nayexma ga 7 ga woramacurigü. Rū naãxwa nayexma ga wüxi ga tara ga guxücüwawa téxü. Rū nachiwe rü ñoma üèxcü poraãcü nguxetügurüü nixi.

17 Rū yexguma nüxü chadèuxgu, rü napëxegu chayangu ñoma chayuxürüü. Natürü ga nüma rü norü tügünemëxëmaã choxü ningögü, rü ñanagürü choxü:

“¡Tãxü i cumuüxü! Choma nixi i chaxira chayex-maxü rü guxügutáma changëxmaëchaxü.

18 Rū choma nixi i yuwa ícharüdaxü rü ñuxma rü chamaxü. Rū üpa rü chayü, natürü i ñuxma rü marü guxügutáma chamaxëcha. Rū choxmëxwa nangëxma na ñuxgu tá nayuxü i wüxichigü i duüxü. Rū ngëxgumarüü ta choma nixi i namaã ichacuáxü i ngëma nachica i ngextá ínangëxmagüxüwa i guxüma i duüxügü i yuexü.

19 Rū ñuxma rü chanaxwëxe i cunaxümatü i ngëma nüxü cudauxü. Rū ngëma nixi i ñuxma ngëma yaxögüxümaã ngupetüxü, rü ngëma yixcúra tá ngupetüxü.

20 Rū ñuxma rü tá cuxcèx chanangoxëë i ngëma ëxügüxü i ngëma 7 i woramacurigü i chorü tügünemëxëwa nüxü cudauxüchiga rü ngëma 7 i weraarü üruügü i uirunaxcèxchiga. Rū ngëma 7 i woramacurigü i nüxü cudauxü, rü ngëma äëxgacügü i ngëma 7 tucümü i yaxögüxüëtüwa

ngëxmagüxüchiga nixĩ. Rũ ngẽma 7 i weraarũ üruũgũ rũ ngẽma 7 tucumũ i yaxõgüxü i yima 7 ya ãnewa ngëxmagüxüchiga nixĩ”.

2

*Ore ga yema 7 tucumũ ga yaxõgüxüçèx ümatüxü
Ore ga yema yaxõgüxü ga Epéchiuarũ ãnewa yex-
magüxüçèx ümatüxü*

¹ “Rũ ñuxma chanaxwèxe i ngẽma Epéchiuwa ngëxmagüxü i yaxõgüxüãrũ ãëxgacüçèx cunaxümatü, rũ ñacurügu nüxü: ‘Ñãã nixĩ i norü ore ya yima ngẽma yaxõgüxütanügu yarüxüüçü rũ norü tügünemëxëmaã nüxna daucü i ngẽma yaxõgüxüãrũ ãëxgacügü’.

² Rũ ñanagürü i nümax:

‘Choma nüxü chacuèx i guxüma i ngẽma cuxüxü. Rũ nüxü chacuèx na ñuxãcü poraãcü choxü cupuracüxü rũ ñuxãcü cunaxüamaxü i ngẽma puracü woo ngẽmacèx muxüma i guxchaxügu cuxçèx ínguxgu. Rũ nüxü chacuèx na tama curü me yĩxü i ngẽma duüxügu i chixexü ügüxü. Rũ ngëxgumarüü ta nüxü chacuèx na meã cunangugüarü maxüãxü i ngẽma duüxügu i nügu ixugüxü na Tupana imugüxü yixígüxü natürü tama aixcüma ixígüxü na Tupana yamugüxü. Rũ cuma rũ nüxü cucuèxama na idorateëxmaregüxü yixígüxü.

³ Rũ woo naguxcha i ngẽma puracü i chauxçèx cuxüxü, natürü cunaxüama. Rũ woo chaugagu poraãcü ngüxü na quingexü, natürü yaxna namaã cuxĩnü, rũ tama nüxü curüchau.

⁴ Natürü nangẽxma i wüxi i cuxüxü i tama chorü me ixixü. Rü ngẽma nixĩ na tama noxrirüü choxü cungechaüxü i ñuxmax.

⁵ Rü ngẽmacèx i ñuxma na ngẽma chixexügu cun-guxü, rü name nixĩ i nüxna cucuèxãchi na ñuxãcü choxü cungechaüxü ga noxrix. Rü name nixĩ i nüxü curüxo i curü chixexü rü noxrirüü choxü cungechaüãcüma mexü cuxü. Natürü ngẽxguma chi tama nüxü curüxoxgu i curü chixexü, rü paxa tá cuxü íchayadau, rü tá cuxü chaxo na tama ngẽma togü i yaxögüxütanüwa cuxãchicaxüçèx.

⁶ Natürü nangẽxma i wüxi i cuxüxü i chorü me ixixü. Rü ngẽma nixĩ na naxchi cuxaixü i ngẽma chixexü i naxügüxü i ngẽma Nicoraítägü. Rü choma rü ta naxchi chaxai i ngẽma chixexü i naxügüxü’.

⁷ Rü yixema ãchixexë rü name nixĩ i naga taxĩnü i ngẽma Tupanaãe i Üünexü nüxü ixuxü namaã i ngẽma yaxögüxütücumügü”. Rü ñanagürü:

“Yixema nüxü rüporamaëxë i chixexü rü tá tüxü nüxü chamuxnetaxëe i norü o i ngẽma orix i tüxü maxëxëxü i Tupanaãrü orixnecüwa ngẽxmaxü”, ñanagürü i Naãe i Üünexü.

Ore ga yema yaxögüxü ga Esmiraarü ñãnewa yex-magüxüçèx ümatüxü

⁸ Rü yema chomaã idexaxü rü ñanagürü ta:

“Chanaxwëxe i Esmirawa ngẽxmagüxü i yaxögüxüãrü ãëxgacüçèx cunaxümatü, rü ñacurügü tá: ‘Ñãã nixĩ i norü ore ya yima nüxĩra yexmacü rü guxüguma ngẽxmaëchacü ga paxaãchi yucü rü wenaxarü maxüçü’.

⁹ Rü ñanagürü i nümax:

‘Choma nūxŭ chacuèx i guxŭma i ngēma cuxŭxŭ. Rŭ nūxŭ chacuèx na ñuxăcŭ ngúxŭ quingexŭ. Rŭ nūxŭ chacuèx na cungearŭ dĭeruăxŭ i ñoma i naănewa, natŭrŭ daxŭguxŭ i naănewa cuxŭ nangĕxma i ngēma taguma gúxŭ. Rŭ nūxŭ chacuèx na ñuxăcŭ chixri cuchiga yadexagŭxŭ i ngēma duŭxŭgŭ i nŭgŭ ixugŭxŭ na Yudĭugŭ yixĭgŭxŭ. Natŭrŭ i nŭmagŭ rŭ aixcŭma Chatanáărŭ duŭxŭgŭmare nixĭgŭ.

¹⁰ ;Rŭ tăxŭ i cumuŭxŭ naxcèx i ngēma ngúxŭ i tá quingexŭ! Rŭ ngoxo i Chataná rŭ tá norŭ duŭxŭgŭxŭ namu na poxcupataŭgu pexŭ napoxcuexŭcèx i ñuxre i pema na ngēmaăcŭ pexŭ naxŭxŭcèx. Rŭ ñuxre i ngunexŭ tá ngúxŭ pingegŭ. Natŭrŭ woo ngēmaăcŭ ngúxŭ pingegŭgu rŭ chanaxwèxe i choxŭ cuyaxŭdŭma ñuxmatăta cuyŭx. Rŭ choma rŭ tá cuxna chanaxă i curŭ âmare i maxŭ i taguma gúxŭ’.

¹¹ Rŭ yĭxema âchixexĕ rŭ name nixĭ i naga taxĭnŭ i ngēma Tupanaăĕ i Ūĭnexŭ nūxŭ ixuxŭ namaă i ngēma yaxŭgŭxŭtŭcumŭgŭ”. Rŭ ñanagŭrŭ:

“Yĭxema ñoma i naănewa nūxŭ rŭporamaĕxĕ i chixexŭ, rŭ tăŭtăma Tupana ngoxogŭxŭ ĩpoxcuexŭwa tŭxŭ nawogŭ”, ñanagŭrŭ i Naăĕ i Ūĭnexŭ.

Ore ga yema yaxŭgŭxŭ ga Pérgamuărŭ ĩănewa yexmagŭxŭcèx ũmatŭxŭ

¹² Rŭ yema chomaă idexaxŭ rŭ ñanagŭrŭ ta:

“Chanaxwèxe i Pérgamuwa ngĕxmagŭxŭ i yaxŭgŭxŭărŭ âĕxgacŭcèx cunaxŭmatŭ, rŭ ñacurŭgŭ tá: ‘Ñăă nixĭ i norŭ ore ya yima nūxŭ nangĕxmacŭ i ngēma tara i guxŭcŭwawa tĕxŭ’.

¹³ Rŭ ñanagŭrŭ i nŭmax:

‘Choma nüxü chacuèx na yima ñãne ya Chataná poraãcü namaã ícuáxünewa na cumaxüxü. Natürü woo ngëxma na cuxãchiüxü, rü tama choxü ícutèx. Rü woo yexguma chorü orearü uruü ga mecü ga Atípaxü yamèxgügu nagu ga guma ñãne ga nawa Chataná duüxügümaã ícuáxüne, rü tama nüxü curüxo na choxü cuyaxõõmaxü.

¹⁴ Natürü nangëxma i ñuxre i tacü i cuxüxü i tama chorü me ixüxü. Rü ngëma nixi na cugüxütawa cunangëxmagüxëxü i ñuxre i curü duüxügü i tama nüxü rüxoechaüxü i ngëma nguxëëtae ga nuxcüma Baráü Yudíugüarü ãëxgacü ga Baráxü namaã ucuxëxü na chixexügu Yudíugüxü nayixëxüçèx. Rü yema Yudíugü rü yema ucuxëgagu nawa naxi ga yema petagü ga togü ügüxü naxcèx ga norü tupanenetachicünèxãgü. Rü yexgumarüü ta yema ucuxëgagu nixi ga ñã ga ngemaã namaxëxü ga Yudíugü. Rü ñuxma i ñuxre i curü duüxügü i Pérgamuwa ngëxmagüxü rü nagu naxi ga yema nuxcümaüxü ga nguxëëtae ga chixexü, rü tama nüxü narüxoechaü.

¹⁵ Rü ngëxgumarüü ta ngëma cunangëxmagüxëe i ñuxre i duüxügü i tama nüxü rüxoechaüxü i ngëma Nicoraítägüarü nguxëëtae i Baráüärü nguxëëtaeruü chixexü.

¹⁶ Rü ngëmacèx chanaxwèxe i nüxü curüxo i ngëma chixexü. Rü ngëxguma chi tama nüxü curüxoxgu, rü paxa tá ngëma cuxütawa chaxü rü ngëma tara i chauèxwa ngëxmaxümaã tá ngëma duüxügüxü chadai’.

¹⁷ Rü yixema achixexë rü name nixi i naga taxĩnü i ngëma Tupanaãe i Üünexü nüxü ixuxü namaã i ngëma yaxõgüxütücumügü”. Rü ñanagürü:

“Yíxema nüxü rüporamaẽxẽ i chixexü rü tá tüxna chanaxã i pãu i daxũcũãx. Rũ tá tüxna chanaxã ya wüxi ya nuta ya chócü i wüxi i naega i ngexwacaxüxü nagu ümatüxü. Rũ yíxema nayaxuxexicatama tixí ya nüxü cuáxe i ngema naéga”, ñanagürü i Naã i Üünexü.

Ore ga yema yaxõgüxü ga Tiatíraarü ñãnewa yexmagüxüçèx ümatüxü

¹⁸ Rũ yema chomaã idexaxü rü ñanagürü ta:

“Chanaxwèxe i Tiatírawa ngëxmagüxü i yaxõgüxüãrũ ãëxgacüçèx cunaxümatü, rü ñacurügü tá: ‘Ñã nixí i norü ore ya yima Tupana Nane ya ñoma üxüemarü i yauraxetüçüçü rü nacutügü rü ñoma cobre i meãma ípixürü ixíxüne’.

¹⁹ Rũ ñanagürü i nümax:

‘Choma nüxü chacuèx i guxüma i ngëma mexü i cuxüxü. Rũ nüxü chacuèx na ñuxãcü cumüçügüxü cungechaüxü, rü ñuxãcü meãma choxü na cuyaxõxü, rü ñuxãcü nüxü na curüngüxëxü i ngëma togü i yaxõgüxü, rü ñuxãcü yaxna namaã cuxĩnüxü i guxchaxügü. Rũ nüxü chacuèx i ñuxma na noxriarü yexera cunaxüxü i ngëma cuxü chanaxwèxexü.

²⁰ Natürü nangëxma i wüxi i cuxüxü i tama chorü me ixíxü. Rũ ngëma nixí na ngëma cunangëxmaxëëchaxü i ngëma ngexü i Yechabé i nügü ixuxü na Tupanaãrũ orearü uruü na yíxü, natürü norü nguxëëtaemaã chorü duüxügüxü ngema womüxëxü na chixri namaxëxüçèx, rü naí i ngemaã inapegüxüçèx, rü nangõxgüãxüçèx i ngëma õnagü i togü norü

tupananetachicünèxãgücèx dèixũ na ngẽmamaã nũxũ yacuèxũgũxũcèx.

21 Rũ choma rũ marũ ngĩxũ íchananguxẽẽ rũ yaxna ngĩmaã chaxĩnũ na nũxũ naxoxũcèx i ngẽma ngĩcũma i chixexũ, natürũ tama inaxwèxe na nũxũ naxoxũ rũ ínataãxũ i ngẽma ngĩrũ chixexũ i naxũxũ.

22 Rũ ñuxma i ngẽma nge rũ tá ngĩxũ chidaawexẽẽ na ngĩrũ ngürücarewa ngúxũ yangexũcèx, rũ ngẽma duũxũgũ i ngĩmaã ipexũ i ngẽma nge rũ nümagũ rũ tá ta ngúxũ na yangegũxũcèx ega tama nũxũ naxoegu i ngẽma chixexũ i ngĩmaã naxũgũxũ.

23 Rũ tá chanadai i ngĩãcügũ i ngẽma nge. Rũ ngẽmawa tá nũxũ nacuèxgũ i guxũma i yaxõgũxũ na aixcũma nũxũ chacuáxũ i ngẽma naãẽwa nagu naxĩnũxũ i wüxichigũ i duũxũ. Rũ wüxichigũ i pemax rũ tá pexũ chanaxütanũ ngẽma na ñuxãcü pemaxẽxũãcũma rũ ñuxãcü penaxũxũãcũma.

24-25 Natürũ pemagũ i Tiatíracũãx i tama nagu ìxẽ i ngẽma ngexũãrũ nguxẽẽtae i chixexũ rũ taguma nawa ngúexe i ngẽma ore i togũ naxugũgu rũ Chatanáãrũ ore i ãxũguxũ ixĩxũ, rũ pemaã nũxũ chixu rũ ngẽma pexũ chanaxwèxexũ nixĩ na meã namaã penguxũgũxũ rũ naga pexĩnũèxũ i ngẽma chorũ ore ñuxmatáta íchangu i chomax. Rũ ngẽxĩcatama nixĩ i pexũ chanaxwèxexũ.

26 Rũ yixema nũxũ rüporamaẽgũxe i ngẽma chixexũ rũ naxũgũamaxẽ i ngẽma tüxũ chanaxwèxexũ ñuxmatáta tayuemare, rũ tá chaugũxũtawa tüxũ chaxũchica na wüxigu chomaã guxũãrũ ãẽxgacũ tixĩgũxũcèx.

27 Rũ yema Chaunatü ãẽxgacũxũ choxũ na

ixĩxẽẽxũrũ tá tũxna chanaxã i pora na guxũ i nachiuãnegũmaã taporaexũcèx. Rũ ngẽxguma ñoma i naãnecũãx i duũxũgũ tama tũmaga ñnũegu rũ ñoma wũxi i tũxũ ngĩxũ ipuxẽẽxũrũ tá namaã tixĩgũ rũ poraãcũ tá tanapoxcue.

²⁸ Rũ tá tũxna chanaxã ya yima woramacuri ya pèxmama nũxũ idaucũ’.

²⁹ Rũ yíxema ãchixexẽ rũ name nixĩ i naga taxĩnũ i ngẽma Tupanaãe i Üünexũ nũxũ ixuxũ namaã i ngẽma yaxõgũxũtũcumũgũ” ñanagũrũ.

3

Ore ga yema yaxõgũxũ ga Chardiarũ ñãnewa yexmagũxũcèx ùmatũxũ

¹ Rũ yema chomaã idexaxũ rũ ñanagũrũ ta:

“Chanaxwèxe i Chardiwa ngẽxmagũxũ i yaxõgũxũãrũ ãẽxgacũcèx cunaxũmatũ, rũ ñacurũgũ tá: ‘Ñãã nixĩ i norũ ore ya Tupana Nane ya Naãe i Üünexũ nawa ngẽxmacũ ya yima 7 ya woramacuri nũxũ ngẽxmacũ’. Rũ ñanagũrũ i nũmax: ‘Choma nũxũ chacuèx i guxũma i ngẽma cuxũxũ. Rũ nũxũ chacuèx ta rũ woo guxũwama duũxũgũ nũxũ ixugũgu na Tupanacèx namaxẽxũ i ngẽma yaxõgũxũ i cuxũtawa ngẽxmagũxũ natũrũ tama aixcũma nixĩ i ngẽma, erũ ngẽma yaxõgũxũ rũ tama aixcũma choxũ nayaxõgũ rũ tama aixcũma chauxcèx namaxẽ.

² Rũ name nixĩ i cubaixãchi rũ cugũ íquicuèx rũ cuyangũxẽe i ngẽma íraxũ i mexũ i cuxũ íyaxũxũ i marũ iyarũxoxchaũxũ. Erũ nũxũ chadau rũ ngẽma cuxũxũ rũ tama Tupanapèxewa name.

³ ¡Rü nüxna nacuèxãchi ga yema nguxêetae ga mexũ ga noxri nüxũ cuxĩnüxũ rü cuyaxuxũ, rü nagu ixũ! ¡Rü nüxũ rüxo i ngẽma chixexũ i cuxũxũ! Natürü ngẽxguma tama nüxũ curüxoxgu i curü chixexũ, rü ñoma wüxi i ngîtèxáxũ i ngürüãchi ínguxürüũ tá cuxütawa chaxũ. Rü täütáma nüxũ cucuèx na ñuxguacü yĩxũ.

⁴ Natürü ngẽma Chardiwa cuxũ nangẽxma i ñuxre i duũxũgü i mexũ i tama ñoma i naãneärü chixexũmaã nügü ãũãchiarü maxũãxgũxũ. Rü nümagü rü tá cómuxũmaã nixãxchiru rü ngẽmaãcü tá chomaã inaxĩ, erü nümagü rü duũxũgü i mexũ i chauxcèx maxẽxũ nixĩgü.

⁵ Rü yixema nüxũ rüporamaẽgũxe i chixexũ, rü tá cómuxũmaã tixãxchiru. Rü täütáma nawa tüxũ íchapiéga i ngẽma chorü popera i nagu chayawügũxũ i ngẽma duũxũgü i nüxũ nangẽxmaxũ i maxũ i taguma gũxũ. Rü Chaunatüpẽxewa rü guxũma i norü orearü ngeruũgü i daxũcũãxgüpẽxewa tá tüxũ chixu na chorü duũxũgü tixĩgũxũ’.

⁶ Rü yixema ãchixexẽ rü name nixĩ i naga taxĩnü i ngẽma Tupanaãe i Üünexũ nüxũ ixuxũ namaã i ngẽma yaxõgũxütücumügü”.

Ore ga yema yaxõgũxũ ga Firadérfiarü ãñewa yexmagũxũcèx ümatũxũ

⁷ Rü yema chomaã idexaxũ rü ñanagürü ta:

“Chanaxwèxe i Firedérfiawa ngẽxmagũxũ i yaxõgũxũärü ãẽxgacücèx cunaxümatü rü ñacurügü tá: ‘Ñãã nixĩ i norü ore ya yima Üünecü ya aixcüma Cristu ixĩcü ya Dabírüũ ãẽxgacü ya tacü ixĩcü ya nüxũ nangẽxmacü i pora na

yawãxnaãxüçèx rü nawãxtaãxüçèx i daxüguxü i naãne. Rü ngëxguma texécèx yawãxnaãgu, rü taxucürüwama texé tümachèxwa tanawãxta. Rü ngëxguma texéchèxwa nawãxtaãgu, rü taxucürüwa texé tümacèx tayawãxna’.

⁸ Rü ñanagürü i nümax:

‘Choma nüxü chacuèx i guxüma i ngëma cuxüxü. Rü dücax, cuxü chanatauxchaxëë na togümaã nüxü quixuxüçèx i chorü ore, rü taxucürüwa texé cuxna tanachuxu na cunaxüxüçèx i ngëma puracü. Rü choma nüxü chacuèx na tama aixcüma cuporaxüchixü, erü noxretama nixĩ i ngëma yaxögüxü i cuxütawa ngëxmagüxü. Natürü cuma rü naga cuxĩnü i chorü ore, rü tama icuyacux na chorü duüxü quüxü.

⁹ Rü ngëmacèx i ngëma duüxügü i Chatanáarü ixīgüxü i nügü ixugüxü na chorü duüxügü yixīgüxü natürü tama aixcüma choxrü ixīgüxü, rü tá chanamu na cupëxegu nacaxãpüxügüxüçèx na nüxü nacuèxgüxüçèx na aixcüma cuxü changechaüxü.

¹⁰ Cuma rü meãma cuyanguxëë i ngëma cuxü chamuxü na aixcüma cuyaxõõmaxü naetüwa i ngëma guxchaxügü i cuxü ngupetüxü. Rü ngëmacèx tá cuxü íchapoxü na tama cuxna nanguxüçèx i ngëma guxchaxü i taxü i ñoma i naãnewa tá ínguxü na guxüma i ñoma i naãnecüãx i duüxügüxü naxüxüçèx.

¹¹ Rü paxa tá ngëma cuxütawa chaxü. Rü chanaxwèxe i ñuxma meã cumaxüxürüü meã cumaxecha, na taxúema cuxna napuxüçèx i ngëma curü ãmare.

¹² Rü yíxema nüxü rüporamaëgüxe i guxüma

i chixexü, rü Chaunatü ya Tupanaxütawa tá tüxü changëxmagüxëë na tagutáma ngëma ítachoxüxcèx. Rü tümagu tá chanaxümatü i naëga ya Chaunatü ya Tupana. Rü ngëxgumarüü tá ta tümagu chanaxümatü i naëga ya Tupanaärü ìãne ya Yerucharéü ya ngexwacaxüne ya Tupanaxütawa i daxüguxü i naãnewa íruxixüne. Rü ngëxgumarüü tá ta tümagu chanaxümatü i chauéga i ngexwacaxüxü’.

¹³ Rü yíxema ãchixexë rü name nixĩ i naga taxĩnü i ngëma Tupanaãë i Üünexü nüxü ixuxü namaã i ngëma yaxögüxütücumügü”.

Ore ga yema yaxögüxü ga Laodichéawa yexmagüxcèx ümatüxü

¹⁴ Rü yema chomaã idexaxü rü ñanagürü ta:

“Chanaxwëxe i Laodichéawa ngëxmagüxü i yaxögüxüärü ãëxgacücèx cunaxümatü rü ñacurügü tá: ‘Ñã nixĩ i norü ore ya yima aixcüma ixĩcü ya aixcüma yanguxëëcü i ngëma nüxü yaxuxü rü ore i aixcüma ixĩxüxüxicatama ixucü. Rü nüma nixĩ ga inaxügüãxü ga guxüma ga yema Tupana üxü’.

¹⁵ Rü ñanagürü i nümax:

‘Choma nüxü chacuèx i guxüma i ngëma cuxüxü. Rü nüxü chacuèx na tama wüxi i duüxü i chauxchi aixü quĩxü, natürü tama wüxi i duüxü i aixcüma choxü ngechaüxü quixĩ. Rü chierü noxtacüma wüxi i duüxü i chauxchi aixü quixĩgu rü éxna noxtacüma wüxi i duüxü i aixcüma choxü ngechaüxü quixĩgu.

¹⁶ Natürü ñuxma na írarüwatama choxü cungechaüxü, rü ngëmacèx tá cuxü íchatèx. Erü tama noxtacüma wüxi i duüxü i chauxchi aixü

quixĩ rü tama noxtacüma wüxi i duũxũ i aixcüma choxũ ngechaũxũ quixĩ.

17 Rũ cuma cugũ quixuxgu rü cumuãrũ dĩẽruãx, rü cumuãrũ ngẽmaxũãx, rü meãma cuxũ naxũpetũ, rü taxuũma cuxũ nataxu. Natürũ i cuma rü tama nüxna cucuẽxãchi na chopẽxewa rü wüxi i taxuwama mexũ quiĩxũ, rü wüxi i ngechaũxũchi quiĩxũ, rü wüxi i taxuũma cuxũ ngẽxmaxẽ quiĩxũ, rü ñoma wüxi i ngexetũxũrũũ quiĩxũ, rü ñoma wüxi i ngexchiruxũrũũ quiĩxũ.

18 Rũ ñuxma rü cuxũ chaxucuxẽ na chauxõtawa naxcẽx cutaxexũcẽx i uiru i marũ üxüwa iguxũ i nüxĩcatama ixĩxũ. Rũ ngẽmaãcü tá aixcüma cuxũ nangẽxma i curũ ngẽmaxũ. Rũ ngẽxgumarũũ ta cuxũ chaxucuxẽ na chauxõtawa naxcẽx cutaxexũcẽx i cuxchiru i cómuxũ na ngẽmagu quicúxũcẽx na taxúema cuxũ dauxũcẽx na cungexchiruxũ. Rũ ngẽxgumarũũ ta cuxũ chaxucuxẽ na chauxõtawa naxcẽx cutaxexũcẽx i curũ mẽixõtũxũ na curũmexõtũxũcẽx na wena quidauchixũcẽx.

19 Choma rü tüxũ chaxucuxẽ rü tüxũ ichayarüwẽxãchixẽẽ ya guxãma ya yíxema tüxũ changechaũxẽ. Rũ ngẽmacẽx name nixĩ i nüxũ curũxo i cucüma i chixexũ, rü aixcüma choxũ cungechaũ rü cunaxü i ngẽma cuxũ chanaxwẽxexũ.

20 Rũ dücax, choma rü ããxwa tümacẽx chacagüecha. Rũ ngẽxguma chi texé choxũ ñnügu rü chauxcẽx tayawãxnagu, rü tá tümaxũtagu chaxücu. Rũ tümamaã tá chachibũ rü tümã i chomaã.

21 Rũ yíxema nüxũ rüporamaẽgũxe i chixexũ, rü tá chaugũxõtawa tüxũ charütogũxẽẽ na chomaã ãẽxgacü tixĩgũxũcẽx, yexgumarũũ ga choma rü

nüxü na charüporamaëxü ga chixexü, rü ñuxüchi Chaunatüxütawa na chayarütöxürüü na namaã äëxgacü chiïxücèx'.

²² Rü yíxema ächixexë rü name nixĩ i naga taxĩnü i ngëma Tupanaãe i Üünexü nüxü ixuxü namaã i ngëma yaxögüxütücümügü”, ñanagürü ga yema chomaã idexaxü.

4

Tupanaxü nataxëëgü i daxüguxü i nañewa

¹ Rü yemawena ga choma ga Cuáü rü nüxü chadau ga wüxi ga îâx ga iwãxnaxü ga daxüguxü ga nañewa. Rü yema naga ga nacornetagaraüxü ga noxri nüxü chaxĩnüxü ga chomaã idexaxü, rü ñanagürü choxü:

“¡Nuxã naxĩnagü! Rü tá cuxü nüxü chadauxëe i ngëma yixcüra tá ngupetüxü”, ñanagürü.

² Rü yexgumatama ga choma rü Tupanaãe i Üünexü rü chauãëmaã inacuèx, rü daxüwa nanaga. Rü yéma daxüguxü ga nañewa nüxü chadau ga wüxi ga tochicaxü ga mexëchixü ga yéma Tupana nawa rütöxü.

³ Rü guma yema tochicaxüwa rütöcü, rü ñoma nuta ya mexëchicü ya yasperüü nixĩ na namexü rü ñoma nuta ya cornalínarüü nixĩ na namexü. Rü yema tochicaxüetüwa nayexma ga wüxi ga chirapa ga ñoma nuta ga esmerádarüü mexëchicü.

⁴ Rü yema tochicaxücüwawa nayexmagü ga 24 ga togü ga tochicaxügü ga nüxü ínumaëguächixü. Rü yema tochicaxügüwa narütogü ga 24 ga äëxgacügü ga yaxögüxüârü ixīgüxü. Rü cómüxümaã nixãxchiru rü uirunaxcèx nixĩ ga norü ngèxcueruügü.

⁵ Rū yema nachica ga Tupana írütöxüwa ínaxüxü ga bèixbēxanexü rü duruanexü rü nagagü. Rū yema tochicaxüpēxewa nayexma ga 7 ga omügü ga yéma naīgüxü. Rū yema omügü nixī ga Tupanaãe i Üünexü ga yema 7 ga yaxōgüxütücümümaã icuáxü.

⁶ Rū yema Tupanaãrū tochicaxüpēxewa rü ñoma dexáétüwarüü ixixümaã nachaxu rü nichipetü woruarüü. Rū yema tochicaxüxü ínachomaēguãchi ga āgümücü ga daxüçüãx ga maxēxü ga guxüwama āxētüxü naweama rü napēxewa.

⁷ Rū wüxi ga yema daxüçüãx ga maxēxü rü nanaxairaxü. Rū yema to rü nanawocaraxü. Rū yema norü tomaēxpüx rü nanaduüxüchiweraxü. Rū yema norü āgümücü rü nanaxiyü i gonagüxüraxü.

⁸ Rū yema āgümücü ga daxüçüãx ga maxēxü, rü wüxichigü nüxü nayexma ga 6 ga naxpēxatügü. Rū guxüwama ga naxpēxatüétüwa rü naxpēxatütüüwa rü namuxētü. Rū ngunecü rü chütacü rü ñanagürügüecha:

“Naxüüne, naxüüne, naxüüne nixī ya tórü Cori ya Tupana ya guxüētüwa ngēxmacü rü woetama ngēxmaēchacü”, ñanagürügüecha.

⁹⁻¹⁰ Rū yema daxüçüãx ga maxēxü, rü yexguma nüxü yacuètüügüüxgu ga guma tochicaxüwa rütocü, rü moxē nüxna naxāgügu, rü yema 24 ga ãēxgacügü ga yaxōgüxüãrū rü yima woetama ngēxmaēchacüpēxegu nacaxāpüxügü, rü nüxü nicuètüügü, rü napēxegu nananu ga norü ngèxcuerüügü.

¹¹ Rū ñanagürügü:

“Pa Torü Cori, Pa Torü Tupanax, cuxü nixĩ i namexü na ticuèxüügüxü rü cuxü tataxëëgüxü, erü guxüetüwa cungëxma. Yerü cuma cunaxü ga guxüma rü curü ngúchaŭgagu nixĩ i nangóxü i ñuxmax”, ñanagürügü.

5

Popera ga idixixüchiga rü Tupana Nane ga ñoma wüxi ga carnerurüü imácüchiga

¹ Rü ñuxüchi nüxü chadau ga guma tochicaxüwa rütocü, rü norü tügünemëxëwa nanange ga wüxi ga popera ga idixixü. Rü düxëtüwa rü aixepewa rü naxãmatü ga yema popera. Rü 7 wa niñaxtachipëxe.

² Rü nüxü chadau ga wüxi ga norü orearü ngerüü ga daxücüãx ga poraxüchixü ga tagaãcü ícaxü rü ñaxü:

“¿Texé tixĩ ya yíxema mexe na tayagautanüxü i norü ñaxtachipëxexü rü ítayadixgüxü i ñaã popera?” ñaxü.

³ Natürü woo ga daxügüxü ga naãnewa rü bai ga ñoma ga naãnewa rü bai ga yuexütanüwa, rü tataxuma ga texé ga mexe na ítayadixgüxü rü nüxü tadaumatüxü na ñuxü ñaxü ga yema popera.

⁴ Rü choma rü poraãcü chaxaxu yerü tataxuma ga texé ga mexë na ítayadixgüxü rü nüxü tadaumatüxü na ñuxü ñaxü ga yema popera.

⁵ Natürü wüxi ga yema 24 ga ãëxgacügü ga yaxõgüxüãrü, rü ñanagürü choxü:

“¡Tãxü i cuxaxuxü! Erü yima Cristu ya Yudátaa ya airüxü poracü ya ãëxgacü ya Dabítaa ixícü, rü marü nüxü narüyexera i guxüma i chixexü.

Rü ngẽmacèx nüma nixĩ i namexũ na yagautanũãxũcèx i ngẽma 7 i norü ñaxtachipẽxexũ i ngẽma popera rü na íyawẽgũãxũcèx”.

⁶ Rü ñuxũchi nüxũ chadau ga Tupana Nane ga ñoma wüxi ga carneruxacü ga mèxwa írüdaxũrüũ yexma chicü naxũtagu ga guma tochicaxũwa rütocü rü natanügu ga yema ägümücü ga daxũcũãx ga maxẽxũ rü yema 24 ga äẽxgacügü. Rü nüxũ nayexma ga 7 ga nachatacuxre ga norü poraarü cuèxruũ rü 7 ga naxètü. Rü guma 7 ga naxètü rü ngẽma nixĩ i Tupanaãe i Üünexũ i guxũma i ñoma i naãnewa namuxũãrũ cuèxruũ ixĩxũ.

⁷ Rü guma pecaduarü ütanücèx yucü rü guma tochicaxũwa rütocücèx nixũ, rü nanayaxu ga yema popera ga norü tügünemẽxèwa yexmaxũ.

⁸ Rü yexguma nayauxãgu ga yema popera, rü yema ägümücü ga daxũcũãx ga maxẽxũ rü yema 24 ga äẽxgacügü rü inacaxgũãpũxü napẽxegu ga guma pecaduarü ütanücèx yucü. Rü wüxichigü ga yema äẽxgacügü rü nüxũ nayexma ga wüxi ga norü paxetarũ ga arpa. Rü yexgumarũ ta nüxũ nayexma ga copa ga uirunaxcèx ga pumaratẽxemaã napagũxũ. Rü yema pumaratẽxe rü nayixichi ga yexguma yaxaxgu. Rü yema pumaragü, rü ngẽma nixĩ i Tupanaãrũ duũxũgũarü yumüxègũarü cuèxruũgü.

⁹ Rü nagu nawiyaegü ga wüxi ga wiyae ga yexwacaxũxü ga ñaxũ:

“Cuma nixĩ i cumexũ na cunayaxuxũ i ngẽma popera rü cuyagautanũxũ i ngẽma norü ñaxtachipẽxexũ. Yerü cuma rü marü quimèxchirẽx, rü cugũmaã Tupanaãxũ naxcèx cutaxe i nagúxũraũxũ i duũxũgü

i nagúxúrauxú i nachiuñanecũãx i nagúxúrauxú i nagawa idexaguxú.

10 Rû ngëmaguxú cuxüchica i ngextá ãëxgacü íquiixúwa, rû Tupanaârü ngüxëëruügxú cuyaxïgxüëë na cumaã wüxigu guxú i naãnemaã inacuèxgxüçèx”, ñanagürügü.

11 Rû yemawena ichadawenü, rû nüxú chaxínü ga naga ga muxüchixüma ga Tupanaârü orearü ngeruügü ga daxüçüãx. Rû norü ngäxüwa nayexma ga yema tochicaxú rû yema ägümücü ga daxüçüãx ga maxëxú rû yema 24 ga äëxgacügü. Rû namuxüchima ga yema Tupanaârü orearü ngeruügü ga daxüçüãx ga yema yexmaguxú.

12 Rû tagaãcü ñanagürügü:

“Daa nixí ya yima ñoma wüxi i carneruacürüü imácü ga pecaduarü ütanüçèx yucü. Rû nüma nixí i namexú na guxüârü äëxgacü yïxú, rû guxüârü yora yïxú, rû guxú i cuèx nüxú ngëxmaxú, rû guxüârü yexera naporaxú. Rû nüma nixí i namexú na guxãma nüxú ngechaügxú rû nataxëëgxú rû nüxú icuèxüügxú”, ñanagürügü.

13 Rû nüxú chaxínü ta ga naga ga guxüma ga yema Tupana üxú i daxügxú i naãnewa rû ñoma i naãnewa rû naãnetüüwa rû taxtü i taxüwa ngëxmaguxú ga ñaguxú:

“Name nixí na guxügutáma guxãma nüxú icuèxüügxú rû nüxú ngechaügxú rû nataxëëgxú ya yima pecaduarü ütanüçèx yucü rû yima ngëma tochicaxüwa rütocü, erü nümagü nixí i guxüguma äëxgacügü yixïgxú”, ñanagürügü.

14 Rû yema ägümücü ga daxüçüãx ga maxëxú rû ñanagürügü:

“Ngẽmaãcü yiĩ”, ñanagürügü. Rû yema 24 ga ãëxgacügü rû inacaxgüãpûxü rû nüxü nicuèxüügü.

6

Yema 7 ga ñaxtachipëxe-ruüchiga

¹ Rû ñuxüchi nüxü chadau ga yexguma guma pecaduarü ütanüçèx yucü yagauyegu ga yema nüxiraüxü ga norü ñaxtachipëxexü ga yema popera. Rû nüxü chaxĩnü ga wüxi ga yema daxüçüãx ga maxüxü ga tagaãcü ñoma duruanexürüü ñaxü choxü:

“¡Nuã naxü!” ñaxü.

² Rû ichadawenü rû nüxü chadau ga wüxi ga cowaru ga cómuxü. Rû yema naetüwa rütoxü rû nüxü nayexma ga wüxi ga norü würa. Rû wüxi ga ngèxcuerü nüxna naxã. Rû poraãëãcüma norü cowarumaã inaxüãchi na duüxügüxü nayexeraxüçèx.

³ Rû yexguma guma pecaduarü ütanüçèx yucü yagauyegu ga yema norü taxre ga yema poperaarü ñaxtachipëxexü, rû nüxü chaxĩnü ga yema norü taxre ga yema daxüçüãx ga maxüxü ga ñaxü choxü:

“¡Nuã naxü!” ñaxü.

⁴ Rû yema naxü ga wüxi ga cowaru ga dauxü. Rû yema naetüwa rütoxü rû wüxi ga tara ga taxü nüxna naxã. Rû yexgumarüü ta pora nayaxu na iyanaxoxëãxüçèx na nügü nangechaügüxü ga duüxügü. Rû yemaãcü nanaxü na nügü nadëixüçèx ga duüxügü.

⁵ Rû yexguma guma pecaduarü ütanüçèx yucü yagauyegu ga yema norü tomaëxpüx ga yema

poperaarü ñaxtachipêxexü, rü nüxü chaxĩnü ga yema norü tomaêxpüx ga yema daxüçüãx ga maxüxü ga ñaxü choxü:

“¡Nuã naxü!” ñaxü. Rü ichadawenü rü nüxü chadau ga wüxi ga cowaru ga waxüxü. Rü yema naetüwa rütöxü rü naxmêxwa nüxü nayexma ga wüxi ga tacüarü yaruü ga balanza.

⁶ Rü nüxü chaxĩnü ga wüxi ga naga ga yema daxüçüãx ga maxêxüârü ngãxütanüwa inaxüxü ga ñaxü:

“Wüxi i ngunexüârü puracütanü rü naxâtanü i wüxi i kilo i trigu. Rü wüxi i ngunexüârü puracütanü naxâtanü i tomaêxpüx i kilo i chebada. ¡Natürü tâxü i cuyanatauxêêxü i ngêma chixü rü yima binu!” ñanagürü.

⁷ Rü yexguma guma pecaduarü ütanüçèx yücü yagauyegu ga yema norü ägümücü ga yema poperaarü ñaxtachipêxexü, rü nüxü chaxĩnü ga yema norü ägümücü ga yema daxüçüãx ga maxêxü ga ñaxü choxü:

“¡Nuã naxü!” ñaxü.

⁸ Rü ichadawenü rü nüxü chadau ga wüxi ga cowaru ga dexexü. Rü yema naetüwa rütöxü rü Yu nixĩ ga naega. Rü yema naweama ne üxü, rü Yuexüchica nixĩ ga naega. Rü yema taxre nanayauxgü ga pora na ñoma ga naãnewa rü wüxi ga yema norü ägümücütücumü ga duüxügümaã inacuèxgüxüçèx na daimaã rü taiyamaã rü daaweanemaã rü ngoxo idüraexümaã nayuexêêãxüçèx.

⁹ Rü yexguma guma pecaduarü ütanüçèx yücü yagauyegu ga yema norü wüximêêxpüx ga yema poperaarü ñaxtachipêxexü, rü nüxü chadau ga

wüxi ga nachica ga ngextá Tupanacèx naxñnagü nawa yagugüxü na nüxna naxãgüãxücèx. Rü yema nachicatüüwa nüxü chadau ga naãëgü ga yema duüxügü ga Tupanaârü orexü na yaxugüxücèx nadèixü.

¹⁰ Rü yema naãëgü rü tagaãcü ñanagürügü:

“Pa Torü Cori ya Guxüetüwa Ngëxmacü rü Üüncü rü Ixaixcümacüx, ¿ñuxgura tá ta i nüxna cucaxü rü cunapoxcuexü i ngëma duüxügü i chixexü ga toxü dèixü?” ñanagürügü.

¹¹ Rü ñuxüchi ga Tupana rü wüxichigü ga yema duüxügüna nanaxã ga naxchiru ga máxü rü cómuxü. Rü yema duüxügüãëgüxü ñanagürü:

“¡Paxaãchi iperüngüë ñuxmatáta yangu i peeneëgü i Cristuaxü puracüexü i pexrüü tá dèixü!” ñanagürü.

¹² Rü yexguma guma pecaduarü ütanücèx yucü yagauyegu ga yema norü 6 ga yema poperaarü ñaxtachipëxexü, rü nüxü chadau ga poraãcü na naxĩãxãchianexü. Rü üèxcü rü wüxi ga naxchiru ga waxcharaxürüü nixĩ. Rü tauemacü rü guxüwama nagürüü naduema.

¹³ Rü woramacurigü rü ëxtagü rü daxüwa narüyi rü ñoma ga naãnegu nayi. Rü ñoma orixi doxüxüma buanecü ya tacü rüyixëëxürüü nixĩ.

¹⁴ Rü guxüma i daxüwa nüxü idauxü rü inayarütaxu. Rü ñoma wüxi i popera i dixcumüãchixü rü iiyarütaxuxürüü nixĩ. Rü guxüma ga mëxpúnegü rü capaxügü rü nixĩgachi ga nachicawa.

¹⁵ Rü ñoma ga naãnewa yexmagüxü ga nachiüãnegüarü ãëxgacügü, rü mëxpúnemagu

rü mèxpñeârü nutatanügu nicuxgü. Rü wüxigu yexma namaã nicuxgü ga yema togü ga ãëxgacügü ga taxügü ga ñoma ga naãnemaã icuèxgüxü, rü churaragüarü ãëxgacügü ga taxügü, rü yema duïxügü ga muârü dïeruãxgüxü, rü yema duïxügü ga ñoma ga naãnewa poraexü, rü guxüma ga duïxügü ga coriãxgüxü, rü guxüma ga duïxügü ga ngearü coriãxgüxü.

¹⁶ Rü guxüma ga nümagü, rü guma mèxpñexü rü guma nutagüxü ñanagürügü:

“¡Toétügu peyi na toxü ipicuxgüxücèx naxchaxwa ya yima ngẽma tochicaxüwa rütocü, rü naxchaxwa ya yima pecaduarü ütanücèx yucü erü tama tanaxwèxe na toxü napoxcuexü!

¹⁷ Erü marü ínangu i ngẽma ngunexü i ãücümaxü i nagu napoxcuexü i ngẽma duïxügü i tama Tupanaârü íxügüxü. ¿Rü texé tá namaã tapora i ngẽma?” ñanagürügü.

7

Yema Yudíugü ga nacatüwa cuèxruüãxgüxüchiga

¹ Rü yemawena rü nüxü chadau ga ägümücü ga Tupanaârü orearü ngeruügü ga daxücüãx ga ñoma ga naãneârü ägümücüpêxegu chigüxü. Rü ínapoxügü ga gucüma ga buanecügü na tama waixümuãneetügu naxüxücèx, rü tama taxü i taxtüétügu naxüxücèx, rü bai i tacü rü naíetügu naxüxücèx.

² Rü yexgumarüü ta nüxü chadau ga wüxi ga Tupanaârü orearü ngeruü ga daxücüãx ga üèxcü íyarügoxüwaama ne üxü. Rü nüxü nayexma ga Tupana ya Maxücüarü tacüarü üégarüü. Rü nüma rü

tagaãcü nüxna nacagü ga yema togü ga ãgümücü ga Tupanaãrü orearü ngeruũgü ga nayauxgüxü ga pora na nachixexẽẽgüãxücèx ga guxüma ga waixüümü rü guxüma ga taxü ga taxtü.

³ Rü ñanagürü nüxü:

“¡Tãxü i yatacüma penachixexẽẽxü i waixüümü rü taxtü i taxü rü naĩgü, ñuxmatáta nacatüwa tayaxüarü cuèxruũãxgü i ngẽma Tupanaãrü duũxgü ixĩgüxü!” ñanagürü.

⁴ Rü nüxü chaxĩnü ga ñuxre na yĩxü ga yema cuèxruũãxgüxü. Rü guxüma ga Yudíugütanüwa rü 144,000 nixĩ.

⁵⁻⁸ Rü yema cuèxruũãxgüxü ga Yudíugü, rü ñaã nixĩ:

Yudátaagü - 12,000

Rubéũtaagü - 12,000

Gadutaagü - 12,000

Achetaagü - 12,000

Netarítaagü - 12,000

Manachétaagü - 12,000

Chimeũtaagü - 12,000

Lebítaagü - 12,000

Ichacátaagü - 12,000

Chaburãũtaagü - 12,000

Yúchetaagü - 12,000

Beyamítaagü - 12,000

⁹ Rü yemawena ichadawenü, rü nüxü chadau ga muxüchixüma ga nagúxüraũxü ga duũxgü ga nagúxüraũxü ga nagawa idexagüxü ga guxüma ga nachiuãnewa ne íxü. Rü yema tochicaxüpẽxegu rü guma pecaduarü ütanücèx yucüpẽxegu nachigü. Rü yema na namuxüchixü rü taxucürüwa texé tayaxugü na ñuxre yĩxü. Rü naxchiru ga

icómüxü rü imáxümaã nixãxchiru. Rü naxmëxwa nanangegü ga wairaátügü.

¹⁰ Rü guxüma ga nümagü rü tagaãcü ñanagürügü:

“Yima tórü Tupana ya tochicaxüwa rütocü rü yima pecaduarü ütanücèx yucü nixĩ ya tüxü maxëxëëgücü”, ñanagürügü.

¹¹ Rü guxüma ga Tupanaärü orearü ngeruügü ga daxüçüãx rü nüxü ínachimaëguãchi ga yema tochicaxü rü yema 24 ga ãëxgacügü rü yema ägümücü ga daxüçüãx ga maxëxü. Rü yema tochicaxüpëxegu nanangücuchitanü ga yema orearü ngeruügü, rü Tupanaxü nicuèxüügü.

¹² Rü ñanagürügü:

“Rü ngëmaãcü yĩ. Rü nüma nixĩ i namexü na guxüguma guxãma nüxü icuèxüügüxü, rü nataxëëgüxü, rü moxë nüxna ixägüxü, rü nüxü ingechaügüxü, erü guxü i cuèx nüxü nangëxma, rü guxüetüwa nangëxma, rü guxüärü yexera napora. Rü ngëmaãcü yĩ”, ñanagürügü.

¹³ Rü ñuxüchi wüxi ga yema 24 ga ãëxgacügü rü choxna naca, rü ñanagürü:

“¿Texégü tixīgü ya yixema cómüchirugüxe, rü ngextá ne taxĩ?” ñanagürü.

¹⁴ Rü choma chanangãxü, rü ñacharügü:

“Pa Corix, cuma nixĩ i nüxü cucuáxü na texégü tixīgüxü”, ñacharügü. Rü yexguma ga nüma rü ñanagürü:

“Yixemagü tixīgü ga nawa ngupetütanüxë ga yema ngüxü ga taxü rü marü tügü iyauxgüchiruxe nagüwa ga guma pecaduarü ütanücèx yucü. Rü ngëmacèx nixĩ i ticómüchiruxü.

¹⁵ Rü ngëmacèx nixĩ i Tupanaärü tochicaxüpëxewa tangëxmagüechaxü rü ngunecü

rü chütacü rü Tupana íngëxmaxüwa nüxü tapuracüexü. Rü nümatama ya Tupana ya tochicaxüwa rütocü rü tüxna nadau.

¹⁶ Rü marü tagutáma wenaxârü taiya tüxü nangux, rü tagutáma tiṭawae. Rü marü tagutáma üëxcü tüxü nigu, rü tagutáma üëxcüarü nañanexü tüxü nangux.

¹⁷ Erü yima pecaduarü ütanücèx yucü i ngëma tochicaxüxütawa ngëxmacü, rü tá aixcüma meã tüxna nadau ñoma carnerugüna idauxürüü. Rü nawa tá tüxü nagagü i ngëma dexáarü chuxchuxügü i maxëëruü. Rü Tupana tá tüxü ínanapi i guxüma i tümagüüxëtü”, ñanagürü.

8

Yema norü 7 ga ñaxtachipëxeruüchiga rü yema buetare ga uirunaxcèxchiga

¹ Rü yexguma guma pecaduarü ütanücèx yucü yagauyegu ga yema norü 7 ga yema poperaarü ñaxtachipëxexü, rü ngäxü ga ora nachipetüanemare ga daxüguxü ga nañnewa.

² Rü ñuxüchi nüxü chadau ga yema 7 ga Tupanaärü orearü ngeruügü ga daxücüäx ga yexma Tupanapëxegu chigüxü. Rü wüxichigü nanayaxu ga norü corneta ga nüxna naxãxüne.

³ Rü yemawena ínangu ga wüxi ga to ga Tupanaärü orearü ngeruü ga daxücüäx. Rü yéma nanange ga wüxi ga norü buetare ga uirunaxcèx ga pumaraarü gutëxeruü. Rü yema uirunaxcèx ga pumaraarü gutëxeruütaxmüpëxegu nachi. Rü nanayauxtëxe ga taxü ga pumara ga nüxna naxãxü na yema tochicaxüpëxewa yexmaxü ga pumaraarü gutëxeruütaxmüwa

yaguãxúcèx, na yemaãcü Tupanana naxããxúcèx ga yema pumaratêxe na yema pumaraema rü wüxigu Tupanaãrü duïxügüarü yumüxêmaã Tupanaxütawa nanguxúcèx.

⁴ Rü yema pumaratêxe ga yema orearü ngeruüãxü yexmaxü rü daxü naxüema wüxigu namaã ga Tupanaãrü duïxügüarü yumüxêgü ñuxmata Tupanaxütawa nangu.

⁵ Rü ñuxüchi ga yema orearü ngeruü rü nanayaxu ga yema buetare ga pumaraarü gutêxeruü. Rü yema pumaraarü gutêxeruütaxmüwa nanayaxu ga ãwe ga naïcü, rü gumamaã nanaxüãcu ga guma buetare. Rü ñuxüchi ñoma ga naãneetügu nanaña. Rü yexgumatama poraãcü naduruãchiane, rü poraãcü nicuxcuane rü nibèixbêxane rü naxïãxãchiane.

Tupanaãrü orearü ngeruügü ga daxücüãxãrü cornetachiga

⁶ Rü yexguma ga yema 7 ga Tupanaãrü orearü ngeruügü ga daxücüãx ga icornetaãxü, rü nügü ínamexêégü na nagu yacuegüxúcèx.

⁷ Rü wüxi ga yema Tupanaãrü orearü ngeruü rü nüxïra nayacue ga norü corneta. Rü yexgumatama ñoma ga naãneetügu narüyi ga gáuxü rü üxüema ga nagümaã ãeüxü. Rü wüxi ga yema norü tomaêxpüxarü üye ga ñoma ga naãne rü nixa. Rü yexgumarüü ta wüxi ga yema norü tomaêxpüxarü üye ga naïxnecü rü nixa. Rü guxüma ga natüane rü nixae.

⁸ Rü yema norü taxre ga Tupanaãrü orearü ngeruü rü nayacue ga norü corneta. Rü ñuxüchi

wüxi ga tacü ga taxüchixü ga namèxpüneraüxü ga iyauxraxü, rü yexma taxtü ga taxügu nanaña. Rü wüxi ga yema norü tomaëxpüxarü üye ga taxtü rü nagüxü nananguxuchi.

⁹ Rü wüxi ga yema norü tomaëxpüxarü üyetücumü ga yema taxtüwa maxëxü, rü nayue. Rü yexgumarüü ta wüxi ga yema norü tomaëxpüxarü üyetücumü ga wapurugü, rü inayi.

¹⁰ Rü yema norü tomaëxpüx ga Tupanaärü orearü ngeruü, rü nayacue ga norü corneta. Rü ñuxüchi wüxi ga taxüchicü ga woramacuri ga taemaxüchicü rü daxüwa narüngu. Rü wüxi ga omü ga ixaxürüü nixi. Rü nagu nangu ga wüxi ga yema norü tomaëxpüxarü üye ga natügü rü natüxacügü.

¹¹ Rü guma woramacuri rü Üxüxü nixi ga naega. Rü wüxi ga yema norü tomaëxpüxarü üye ga guxüma ga dexá rü naxüxchiü. Rü muxüma ga duüxügü rü yema dexáwa nayue yerü naxüxchiü.

¹² Rü yema norü ägümücü ga Tupanaärü orearü ngeruü rü nayacue ga norü corneta. Rü wüxi ga yema norü tomaëxpüxarü üye ga üèxcü rü nixo. Rü yexgumarüü ta wüxi ga yema norü tomaëxpüxarü üye ga tauemacü rü woramacurigü rü èxtagü rü nixo. Rü yemaäcü wüxi ga yema norü tomaëxpüxarü üye ga guxüma ga yema rü naxëäne. Rü ga ngunecü rü ägümücü ga ora naxëäne. Rü ga chütacü rü ägümücü ga ora nataxuma ga tauemacü rü bai ga woramacurigü rü bai ga èxtagü.

¹³ Rü yemawena ichadawenü rü nüxü chaxĩnü ga wüxi ga İyü ga daxügu İxexeüxü ga tagaäcü ñaxü: “Nangechaütümüüğü i ngëma duüxügü i yea pecaduãxü i nañnewa maxëxü i ngëxguma

yacuegüãgu tá ya norü cornetagü i ngẽma togü i tomaẽxpüx i Tupanaãrü orearü ngeruũgü”, ñaxũ.

9

¹ Rü yema norü wüximẽẽxpüx ga Tupanaãrü orearü ngeruũ, rü nayacue ga norü corneta. Rü nüxũ chadau ga wüxi ga woramacuri ga daxüwa rüngucü ga ñoma ga naãnegu ngucü. Rü guma woramacuri nanayaxu ga yema ãxmaxũ ga taguma iyacuáxũãrü chawi.

² Rü nayawãxna ga yema ãxmaxũ ga taguma iyacuáxũ. Rü yéma inayagoema ga caxixũ ñoma wüxi i taxũ i uxearü caxixürüũ. Rü yema caxixũ rü nanaxẽẽmaxẽẽ ga üèxcü.

³ Rü yema caxixüwa ínachoxũ ga munügu ga naãneetügu yixũ. Rü yema munügu rü nanayauxgü ga pora ga nüxna naxãxũ na ñoma tuxchinawerüũ duüxügüxũ nachixüçèx.

⁴ Rü yema munümaã nüxũ nixu na tama natüanexũ nachixexẽẽxüçèx rü bai i tacü rü nanetügu rü bai i tacü rü naĩgü. Natürü nanamu na nachixexẽẽgüãxüçèx ga yema duüxügü ga tama Tupanaãrü cuèxruũ nacatüwa yexmaxũ.

⁵ Natürü tama nanamu na yema duüxügüxũ nadèixüçèx. Natürü nanamu na ngüxũ nüxũ yangexẽẽmaregüxüçèx ga wüximẽẽxpüx ga tauemacü. Rü yema ngüxũ ga nüxũ yangexẽẽgüxũ, rü ñoma tuxchinawe duüxügüxũ chixürüũ nixĩ.

⁶ Rü ngẽma ngunexügügu rü duüxügü tá naxçèx nadaugü na nayuexũ, natürü täütáma nayue. Rü woo nanaxwèxegüxüchi na nayuexũ, natürü taxucürüwatáma nayue.

⁷ Rû yema munügü rû ñoma cowaru i guerawa iñürüü nixîgü. Rû naëruwa nüxü nayexma ga tacü ga ñoma ngëxcuerüü ga uirunaxcèrûü ixîgüxü. Rû nachiwe rû nanaduüxüchiweraxügü.

⁸ Rû nayaegü rû ñoma ngeãxyaerüü nixîgü. Rû napütägü rû ñoma aipütägürüü nixîgü.

⁹ Rû naxünewa nayexma ga norü poxüruü ga fierunaxcèx. Rû naxpëxatügüga rû ñoma muxüchine ya caru ya guerawa cowaru tügünegarüü ixîxü.

¹⁰ Rû nareexügü rû ñoma tuxchinawerüü naxãnegu. Rû yema naneguwa rû naxãguchata na wüximëxpüx ya tauemacü duüxügüxü ngüxü yangexëëgüxücèx.

¹¹ Rû yema munügüarü äëxgacü, rû yema äxmaxü ga taguma iyacuáxüârü dauruü nixî. Rû Yudüügügawa ga yema munügüarü äëxgacü, rû Abadóü nixî. Rû Griégügügawa rû Apolióü nixî. Rû ngëma rû: “Chixexëëruü”, ñaxüchiga nixî.

¹² Rû yexma nayacuèx ga yema nüxïraüxü ga chixexü ga taxü, natürü ínayaxüama ga to ga taxre.

¹³ Rû yema norü 6 ga Tupanaârü orearü ngerüü rû nayacue ga norü corneta. Rû nüxü chaxînü ga wüxi ga naga ga yema Tupanapëxewa yexmaxü ga uirunaxcèx ga pumaraarü gutëxeruütaxmüwa inaxüxü.

¹⁴ Rû yema naga rû nanamu ga yema orearü ngerüü ga cornetaãxü, rû ñanagürü nüxü:

“¡Yawëgüxü i ngëma ägümücü i orearü ngerüügü i Chatanáârü ixîgüxü i taxtü i Eufrägegu ngãxügüxü!” ñanagürü.

¹⁵ Rû yemaãcü niwëgüxü ga yema ägümücü ga orearü ngerüügü na nadaiãxücèx ga wüxi ga yema

norü tomaẽxpüxarü üyetücumü ga duũxügü. Yerü ga yema orearü ngeruügü rü woetama yemacèx ínamemaregü na yema ora rü yema ngunexü rü guma tauemacü rü guma taunecü nadaiãxücèx ga yema duũxügü.

16 Rû nüxü chaxĩnü na ñuxre na yĩxü ga yema orearü ngeruüğüarü churaragü ga cwaruétügu íxü. Rû 200 miyónegü nixĩgü.

17 Rû yemaãcü nixĩ ga nüxü chadauxü ga yema cwarugü ga yexguma changoxetügu. Rû yema churaragü ga yema cwaruétügu íxü rü nüxü nayexma ga norü ngèxcuxünexü ga poxüruü ixixü ga ñoma üxüxetürüü iyauraxü. Rû yema poxüruü rü nixãmatü rü nidaumatü rü niyèuxmatü rü nidexmatü. Rû yema cwaruerugü rü ñoma aierurüü nixĩgü. Rû naãxgüwa ínaxüxü ga üxüema rü caxixü rü azufre.

18 Rû wüxi ga norü tomaẽxpüxarü üyetücumü ga duũxügü rü nayue namaã ga yema tomaẽxpüx ga chixexêëruü ga üxüema rü caxixü rü azufre ga yema cwarugüèxwa íchoxüxü.

19 Yerü ga yema cwarugü rü naãxwa rü nareexüwa nixĩ ga nüxü nayexmaxü ga norü pora na duũxügüxü nadèixücèx. Yerü ga nareexügü rü ñoma äxtaperüü nixĩgü, rü yemamaã nanangõx ga duũxügü rü ngüxü nüxü ningexêë rü nanadai.

20 Natürü ga yema togü ga duũxügü ga tama yema poxcuruüğümaã yuexü, rü tama nüxü narüxoe ga yema chixexügü ga naxügüxü. Rû tama nüxü narüxoe na nüxü yacuèxüügüxü ga ngoxogü rü norü tupanenetachicünèxãgü ga uirunaxcèx rü dîêrumünaxcèx rü cobrenaxcèx rü nutagünaxcèx

rü nañnaxcèx. Rü yemaãcü nüxũ nicuèxüügüama ga yema norü tupanenetachicünèxãgü ga ngearü maxũãxũ rü tama nüxũ dauxũ rü tama nüxũ ñnüxũ rü tama ixũxũ.

²¹ Rü tama nüxũ narüxoe na namáètagüxũ, rü yayuüexũ, rü nangẽãègüxũ rü nangĩtèèxgüxũ.

10

Orearü ngeruũ ga nüxũ yexmaxũ ga popera ga idixixũchiga

¹ Rü nüxũ chadau ga wüxi ga to ga Tupanaãrũ orearü ngeruũ ga daxũguxũ ga naãnewa íruxĩxũ. Rü wüxi ga caixanexũãrũ ngãxũwa nayexma, rü wüxi ga chirapa naétügu nabo. Rü nachiwe rü ñoma üèxcürüũ niyauracüü. Rü naparagü rü ta ñoma üxüemarüũ niyauracüü.

² Rü naxmèxwa nüxũ nayexma ga wüxi ga poperaxacü ga íwègüxũ. Rü norü tügünepara rü taxtũ i taxüetügu nachicutü. Rü norü toxwepara rü waixüümüãnegu nachicutü.

³ Rü ñüxũchi ga nüma rü tagaãcü aita naxü ñoma wüxi ya ai ya tagaãcü aita ücürüũ. Rü yexguma aita naxüxgu rü 7 èxpüxcüna naduruãchiane.

⁴ Rü yexguma yema 7 èxpüxcüna na naduruãchianexüguwena rü chanaxümatüchaũ. Natürü nüxũ chaxĩnü ga wüxi ga naga ga daxũguxũ ga naãnewa inaxũxũ ga ñaxũ choxũ:

“¡Tãxũ i cunangoxèèxũ i ngẽma 7 i duruanexũ nüxũ ixuxũ! ¡Rü ngexrüma na cunaxümatüxũ!” ñaxũ choxũ.

⁵ Rü ñüxũchi ga yema Tupanaãrũ orearü ngeruũ ga nüxũ chadauxũ na taxtũ ga taxüetügu rü

waixümëtügu nachicutüxǔ, rü daxǔ naxunagü ga norü tügünechacüü.

6 Rü inaxuneta naegagu ga Tupana ya yima guxüguma maxücü ya yima naxücü i daxüguxǔ i naãne rü ñoma i naãne rü taxtü i taxǔ rü guxüma i tacü nawa ngëxmagüxǔ. Rü ñanagürü ga yema orearü ngeruü:

“Ñuxma rü marü täütáma nuxcü ningu i ngëma Tupana nüxǔ ixuxǔ.

7 Erü ngëxguma nawa nanguxgu na ngëma norü 7 i Tupanaärü orearü ngeruü inaxügüxǔ na yacueãxǔ ya norü corneta, rü ngëxguma tá nixí i yanguxǔ ga yema noxri ëxüguxǔ ga Tupanaärü uneta, yema nuxcümaügüxǔ ga norü orearü uruügümaã nüxǔ yaxuxǔ”, ñanagürü.

8 Rü yema naga ga noxri nüxǔ chaxǎnǔxǔ ga daxügüxǔ ga naãnewa inaxǔxǔ, rü wenaxärü chomaã nidexa. Rü ñanagürü choxǔ:

“¡Naxütawa naxü i ngëma Tupanaärü orearü ngeruü i taxtü i taxǔetügu rü waixümüãneetügu chicutüxǔ! ¡Rü nüxna nayaxu i ngëma poperaxacü i marü íiwëgüxǔ i naxmëxwa ngëxmaxǔ!” ñanagürü.

9 Rü naxütawa chaxǔ ga yema orearü ngeruü, rü nüxna naxcèx chaca ga yema poperaxacü na choxna naxãaxücèx. Rü nüma rü ñanagürü choxǔ:

“Ñãã nixí. ¡Rü nayaxu rü nangõx! Rü cuèxwa rü berurerüü tá namaïcura. Natürü cuanüwa rü tá nanaxüxãchi”, ñanagürü choxǔ.

10 Rü yema orearü ngeruümëxëwa chanayaxu ga yema poperaxacü, rü chanangõx. Rü chauèxwa rü berurerüü namaïcura. Natürü yexguma

chanangõxguwena rü chauanüwa rü nanaxüxãchi rü changüxneca.

¹¹ Rü ñuxüchi chomaã nüxü nixu, rü ñanagürü choxü:

“Name nixĩ na wenaxãrü Tupanaãrü orexü quixuxü namaã i muxüma i nagúxüraüxü i duüxügü, rü muxüma i nachiuãnecüãxgü i duüxügü, rü muxüma i duüxügü i to i nagawa idexagüxü, rü muxüma i nachiuãnegüarü ãëxgacügü”, ñanagürü choxü.

11

Taxre ga orearü uruüchiga

¹ Rü yemawena chanayaxu ga wüxi ga dexnemenèxã ga ngugüruü ixixüne ga choxna naxãxüne. Rü guma choxna naxãcü rü ñanagürü choxü:

“¡Inachi rü nangugü ya yima Tupanapata rü ngẽma pumaraarü gutëxeruütaxmü! ¡Rü yaxugü rü ñuxre yiixü i ngẽma duüxügü i ngẽma Tupanaxü icuëxüügüxü!

² ¡Natürü ngẽma naãxtü ya Tupanapata, rü tãütáma cunangugü! Erü ngẽma duüxügü i tama Tupanaãxü yaxõgüxüna marü nanaxã. Rü nümagü rü tomaëxpüx ya taunecüarü ngãxü tá chixexü namaã naxügü ya yima iãne ya üünene ya Yerucharéü.

³ Rü choma rü tá chanamu i taxre i chorü orearü uruügü na 1,260 i ngunexü duüxügümaã nüxü yaxugüxücèx i chorü ore. Rü nümagü i ngẽma taxre rü tá niwëxchiru na ngẽmawa duüxügü nüxü cuëxgüxücèx na ngechaü nüxü nguxgüxü”, ñanagürü choxü.

⁴ Rū ngēma taxre i orearū uruūgū nixĩ i norū cuèxruū i ngēma taxre i nanetū i orĩbu rū ngēma taxre i weraarū ūruūgū i tórū Cori ya ñoma i naãneārū yora ixĩcüpēxewa ngēxmagūxũ.

⁵ Rū ngēxguma texé chixexũ namaã ūgūchaūgu i ngēma taxre i orearū uruūgū, rū nūmagū rū ūxūema ya naãxwa ínacuexechinemaã tūxũ tá ínagu. Rū ngēmaãcū tá inayanaxoxēē i norū uwanūgū. Rū ngēmaãcū tá tūxũ nadai ya yĩxema chixexũ namaã ūgūchaūxē.

⁶ Rū ngēma taxre i orearū uruūgū rū nūxũ nangēxma i pora na íyachaxãchixūcèx ya pucū na tama napuxūcèx i guxūma i ngēma 1,260 i ngunexūgū i nagu Tupanaārū orexũ yaxugūxũ. Rū ngēxgumarūū ta nūxũ nangēxma i pora na nagūxũ yaxĩxēēgūãxūcèx i dexá. Rū ngēxgumarūū ta nūxũ nangēxma i pora na ñoma i naãnewa namugūãxūcèx i nagúxūraūxũ i poxcuruūgū na ngēmaãcū ngúxũ duūxūgūxũ yangexēēgūxūcèx i ngēxguma ngēma taxre naxwèxegūgu.

⁷ Natürū ngēxguma ngēma taxre i orearū uruūgū naguxēēgūgu na nūxũ yaxugūxũ i Tupanaārū ore, rū ngēma ngoxo i ngēma ãxmaxũ i taguma iyacuáxūwa íxūxūxũ, rū tá ngema taxrena nayuxu. Rū tá nūxũ narüyexera, rū tá nanadai.

⁸ Rū ngēma naxūnegū i ngēma taxre rū tá yima ñãne ga tórū Cori nawa curuchawa ipotane ya Yerucharéūārū ítamūgūwa nawogū. Rū yima ñãne rū nachixe rū ngēmacèx Chodomaārū ñãnemaã rū Equituanemaã nanaxugū.

⁹ Rū tomaēxpūx i ngunexūārū ngāxũ rū muxūma i nagúxūraūxũ i duūxūgū rū muxūma

i guxũ i nachiuãnecũãx i duũxũgũ rü muxũma i duũxũgũ i to i nagawa idexagũchigũxũ, rü tá nüxũ nadaugũ i naxũnegũ. Rü täütáma nanaxwèxegũ na texé inatèxgũxũ.

¹⁰ Rü ngẽma duũxũgũ i ñoma i naãnewa maxẽxũ rü tá nataãægũ na marũ nayuexũ i ngẽma taxre. Rü ngẽma na poraãcü nataãægũxũchixũ rü tá nügũna ãmare naxãgũ, yerũ yema taxre ga orearũ uruũgũ rü poraãcü nanachixewe rü naãewa nananguxẽægũ.

¹¹ Natürũ yema tomaẽxpũx ga ngunexũãrũ ngãxũguwena, rü Tupana wenaxãrũ nanamaxẽxẽẽ ga yema taxre. Rü wenaxãrũ ínarũdagũ. Rü guxũma ga yema duũxũgũ ga nüxũ daugũxũ rü poraãcüxũchi namuũẽ.

¹² Rü ñuxũchi ga yema taxre ga orearũ uruũgũ, rü nüxũ naxĩnüẽ ga wũxi ga naga ga tagaãcü daxũguxũ ga naãnewa inaxũxũ ga ñaxũ:

“¡Nuã daxũwa pexĩ!” ñaxũ. Rü yemaãcü ga nümagũ rü wũxi ga caixanexũgu daxũguxũ ga naãnewa naxĩ. Rü norũ uwanũgũ rü yéma nüxũ narũdaunũ.

¹³ Rü yexgumatama poraãcü naxĩãxãchiane. Rü wũxi ga yema norũ 10 arũ üye ga guma ããne, rü niwèxgũ. Rü 7,000 ga duũxũgũ nayue namaã ga yema ããxãchiane. Rü yema togũ ga duũxũgũ ga maxẽxũ rü poraãcüxũchi namuũẽ. Rü Tupana ya daxũguxũ i naãnewa ngẽxmacũxũ nicuèxũũgũ.

¹⁴ Rü yexma nayacuèx ga yema norũ taxre ga chixexũ. Natürũ paxa tá ínangu i ngẽma norũ tomaẽxpũx ixĩxũ.

Guma norũ 7 ga cornetachiga

15 Rû yema norû 7 ga Tupanaârû orearû ngeruû, rû nayacue ga norû corneta. Rû nayexma ga nagagû ga tagaãcû daxûguxû ga naãnewa inaxûgûxû ga ñagûxû:

“Ñuxma rû yima mecû na namaã inacuèxgûxû i ñoma i naãne, rû nûma nixî ya tórû Cori ya Tupana rû Nane ya Cristu. Rû nûma rû guxûgutáma namaã inacuèxgû”, ñagûxû.

16 Rû nûmagû ga yema 24 ga ãëxgacûgû ga norû tochicaxûgûwa rûtogûxû ga Tupanapëxewa, rû yexma nanangücuchitanû, rû Tupanaxû nicuèxûgû.

17 Rû ñanagûrûgû:

“Pa Torû Cori ya Tupana ya Guxûârû Yexera Poracûx, cuma rû woetama cuyexmaëcha, rû ñuxma rû ta cungëxmaëcha. Rû moxë cuxna taxâgû, erû marû cugûmëxëwa cunangëxmaxëë i guxûma, rû marû icunaxûgû na namaã icucuáxû.

18 Rû ngëma duûxûgû i tama cuxrû ixîgûxû rû poraãcûxûchi nanuë, natürû nawa nangu i ngëma ngunexû i nagu tá cunapoxcuexû. Rû ngëxgumarûû ta marû nawa nangu na nûxû quicagûxû i guxûma i duûxûgû i yuexû. Rû marû nawa nangu na nûxû cunaxûtanûxû i ngëma curû duûxûgû i curû orearû uruûgû, rû ngëma duûxûgû i cupëxewa imexû, rû guxûma i ngëma duûxûgû i cuxû muëxû i yaexû rû buexû. Rû marû nawa nangu na icuyanaxoxëëxû i ngëma duûxûgû i nachixexëëxû i ñoma i naãne”, ñanagûrûgû.

19 Rû ñuxûchi Tupanapata ga daxûguxû ga naãnewa yexmane, rû niwãxna. Rû yéma norû aix-

epewa nüxũ chadau ga yema baú ga Tupanaãrũ uneta ga nutagu ümatũxũ. Rũ nibẽixbẽxane, rũ poraãcü nicuxcuane, rũ naxĩãxãchiane rũ poraãcü gáauxũ narüyi.

12

Wüxi ga nge rü wüxi ga coya ga taxũ

¹ Rũ ñuxũchi daxũwa nangox ga wüxi ga cuèxruũ ga taxũ. Rũ iyexma ga wüxi ga nge ga üèxcürũ iyaurchirucüücü. Rũ ngitüücutüwa nayexma ga tauemacü. Rũ yema ngĩrũ ngèxcueruũ ga ngĩeruwa yexmaxũ, rũ 12 ga woramacurigü nixĩgü.

² Rũ yema nge rü itacharaũ. Rũ poraãcü aita ixü yerü ixíraxacüchaũ rü poraãcü inguxnecaxüchi.

³ Rũ yemawena daxũwa nangox ga to ga cuèxruũ. Rũ yéma nayexma ga wüxi ga coya ga taxüchixũ ga dauxũ ga 7 ga naëru nüxũ yexmaxũ rü 10 ga naxchatacuxre. Rũ wüxichigü ga naëruwa rü nüxũ nayexma ga norü ngèxcueruũ.

⁴ Rũ nareexũmaã inayatüchigü ga wüxitücumü ga norü tomaëxpüxaru üye ga woramacurigü, rü ñoma ga naãneetügu nanawogü. Rũ yema coya rü ngĩpëxegu nayachi ga yema nge ga íraxacüchaũcü, yerü tüxũ nangõxchaũ ga guxema ngĩxãcüxe ga yexguma tabuxgu.

⁵ Rũ yema nge rü ixíraxacü, rü nayatü. Rũ nüma rü tá guxũ i nachiũãneãrũ ãëxgacü nixĩ, rü tá namaã inacuèx. Natürü ga guma ngĩne rü Tupana ngixna nanayaxu rü yema ínatoxũwa nanaga.

⁶ Rũ yema nge rü wüxi ga nachica ga ngextá taxüema íxãpataxũwa iña. Rũ yéma Tupana ngĩxcèx nanamexëẽ ga wüxi ga ngĩchica na yéma ngĩxna

nadauxčèx rü ngĩxũ naxüwemüxčèx ga 1,260 ga ngunexũ.

⁷ Rũ yemawena ga daxũwa rü nügũ nadai. Rũ Miguere ga Tupanaãrũ orearũ ngeruũgũarũ ãẽxgacũ ixĩcũ rü guxũma ga natanũxũ ga orearũ ngeruũgũ, rü nügũ nadai namaã ga yema coya ga taxũchixũ rü norũ orearũ ngeruũgũ. Rũ yema coya rü ñuxũchi norũ orearũ ngeruũgũ i chixexũ rü poraãcũ Tupanaãrũ orearũ ngeruũgũmaã nügũ nadai.

⁸ Natürũ ga yema coya rü norũ orearũ ngeruũgũ rü tama Tupanaãrũ orearũ ngeruũgũxũ narũporamaẽgũ. Rũ ñuxũchi ga yema coya rü norũ orearũ ngeruũgũ rü nangechica ga daxũguxũ ga naãnewa.

⁹ Rũ yemaãcũ ínatèxũchi ga daxũguxũ ga naãnewa ga yema coya ga yema nuxcũmaũxũ ga ãxtape. Rũ nüma rü ngoxogu rü Chatanágu naxãega. Rũ nüma nixĩ i guxũma i ñoma i naãnecũãx i duũxũgũxũ nawomüxẽẽxũ. Rũ nüma rü norũ orearũ ngeruũgũmaã ñoma ga naãnegu narũwoũ.

¹⁰ Rũ ñuxũchi nüxũ chaxĩnũ ga wüxi ga naga ga daxũguxũ ga naãnewa tagaãcũ ñaxũ:

“Ñuxma rü marũ nawa nangu na tórũ Tupana rü norũ duũxũgũxũ namaxẽẽxũ. Rũ ñuxma rü nüma tüxũ nüxũ nadauxẽẽ na guxũãrũ yexera naporaxũ rü guxũãrũ ãẽxgacũ yiĩxũ. Rũ Nane ya Cristu rü marũ tüxũ nüxũ nadauxẽẽ na guxũmaã inacuáxũ. Yerũ marũ daxũguxũ ga naãnewa ínatèxũchi ga Chataná ga ngunecũ rü chütacũ tórũ Tupanapẽxewa taeneẽgũxũ yeũcürũ ixuechaxũ.

¹¹ Rũ nümagũ ga yema taeneẽgũ, rü marũ

Chatanáxũ narüyexeragũ nagũgagu ga guma pecaduarũ ütanüçèx yucũ rü nagagu ga Tupanaârũ ore ga nüxũ yaxugũxũ. Yerũ ga nümagũ rü tama nayanuxũgũ ga norũ maxũ, rü ínamemaregũ na Tupanacèx nayuexũ.

¹² ¡Rü ngẽmacèx petaãẽgũ i guxãma i pema i daxũguxũ i naãnewa ngẽxmagũxe! ¡Natürũ pengechaũtũmũũgũ i pema i yea naãne i pecaduãxũwa ngẽxmagũxe rü taxtũ i taxũwa ngẽxmagũxe! Erũ ngẽma ngoxo i Chataná rü marũ petanũgu narütáe. Rü poraãcü nanu i nüma erũ marũ noxretama i ngunexũ nüxũ ínayaxũ na chixexũ naxũxũ, erũ paxa tá napoxcu”, ñanagürũ ga yema naga.

¹³ Rü yema coya ga taxüchixũ ga Chataná nagu icúxũ rü yexguma nügũ yacuèxãchigu ga ñoma ga naãnegu na natáexũ, rü ngĩwe ningẽchigũ ga yema nge ga íraxacücü.

¹⁴ Natürũ ga Tupana rü ngixũ naxüxpexatũ ga yema nge. Rü nanaxĩyüpexatũgüraxũ. Rü yemaãcü nachica ga ngextá taxúema íxãpataxũwa iña naxchaxwa ga yema coya ga Chataná nagu icúxũ.. Rü yema nachicawa nixĩ ga Tupana ngĩxna dauxũ, rü ngĩxũ üwemüxũ ga tomaẽxpüx ga taunecüarũ ngãxũ.

¹⁵ Rü yema coya ga Chataná rü dexá nügüèxwa ínaxũxũxẽẽ na wüxi ga natü naxüxüçèx, rü yema natümaã ngĩxũ yachaxẽèxüçèx ga yema nge.

¹⁶ Natürũ ga waixümmü rü ningẽx na iyachexẽẽãxüçèx ga yema dexá ga coya nügüèxwa íxũxũxẽẽxũ.

¹⁷ Rü ñuxũchi ga yema coya ga Chataná, rü poraãcüxüchima ngĩmaã nanu ga yema nge. Rü

ínixũ na nũgũ namaã yadèixũcèx ga yema togũ ga ngĩxãcũgũ ga yema nge. Rũ ngẽma ngĩxãcũgũ i ngẽma coyamaã nũgũ dèixũ, rũ ngẽma nixĩ i ngẽma duũxũgũ i meã Tupanaãrũ orega ãnũexũ rũ meã yaxõgũechaxũ i Ngechuchu ya Cristuarũ ore i aixcũma ixĩxũ. Rũ ñuxũchi ga yema coya rũ norũ numaã taxtũ ga taxũãnacũgu nayarũũ.

13

Taxre ga ngoxogũchiga

¹ Rũ nũxũ chadau ga wũxi ga ngoxo ga taxũ ga taxtũgu ãnuãchixũ ga 7 eruxũ rũ 10 chat-acuxrexũ. Rũ wũxichigũ ga naxchatacuxrewa rũ nũxũ nayexma ga norũ ngèxcuerũ. Rũ naẽrugũgu naxũmatũ ga ñuxre ga naegagũ ga Tupanamaã guxchigagũxũ.

² Rũ yema ngoxo ga nũxũ chadauxũ, rũ wũxi ga airũ nixĩ. Rũ naxmẽxgũ rũ chatũ ga taxũmẽxẽgũrũ nixĩ. Rũ naãx rũ wũxi ga aièxrũ nixĩ. Rũ yema coya ga Chataná rũ yema ngoxoxũ naporaxẽẽ na naxrũ naporaxũcèx rũ naxrũ ãẽxgacũ yĩxũcèx na ñoma ga naãnemaã inacuãxũcèx.

³ Rũ wũxi ga naẽruwa ga yema ngoxo, rũ nũxũ nayexma ga wũxi ga taxũ ga norũ oxri ga namaã nayuxchaũxũ. Natũrũ ga yema norũ oxri rũ nũxũ nixẽ, rũ naxcèx nitaane. Rũ guxũma ga ñoma ga naãnecũãx ga duũxũgũ rũ poraãcũ yema ngoxomaã nabaixãchie, rũ nawe narũxĩ.

⁴ Rũ ga duũxũgũ rũ yema coya ga Chatanáxũ nicuèxũũgũ yerũ yema ngoxoxũ naporaxẽẽ na ãẽxgacũ yĩxũcèx. Rũ yexgumarũ ta yema ngoxoxũ nicuèxũũgũ, rũ ñanagũrũgũ:

“¿Texé tangẽxma ya ñaã ngoxorüũ poraxe? ¿Rü texé tapora na namaã tügü tadèixü?” ñanagürügü.

⁵ Natürü ga Tupana rü tama yema ngoxona nanachuxu na nügü yacuèxüũxücèx rü tacü Tupanamaã yaxugüxücèx rü ãëxgacü na yïixücèx ga 42 ga tauemacü.

⁶ Rü yemaãcü chixexü naxü ga yema ngoxo. Rü poraãcü tacü Tupanamaã nixügü. Rü Tupanamaã naguxchiga, rü napatamaã rü ta naguxchiga, rü tümamaã naguxchiga ya guxãma ya yixema daxüguxü i naãnewa ngẽxmagüxe.

⁷ Rü yema coya ga Chataná rü yema ngoxoxü naporaxëe na Tupanaãrü duũxügümaã nügü nadèixücèx ñuxmatáta tüxü nayexera. Rü ãëxgacüxü nayaxixëe na namaã inacuáxücèx ga nagúxüraüxü ga duũxügü ga guxüma ga nachiuãnecüãx ga nagúxüraüxü ga nagawa idexagüxü.

⁸ Rü tá ngẽma ngoxoxü nicuèxüügü i guxüma i duũxügü i ñoma i naãnewa maxëxü i noxritama naãne üxgu ngeégagüxü nawa i norü popera ya yima pecaduarü ütancèx yücü i nagu yawügüãxü i ngẽma duũxügü i marü Tupana nüxna naxãxü i maxü i taguma gúxü.

⁹⁻¹⁰ Rü ngëxguma texé äxchixëgu, rü name nixi i naga taxinü i ñaã tá pemaã nüxü chixuxü. Rü ngëxguma texé tümamaã naxuegugu na tüxü yayauxgüxü, rü noxtacüma tá tiyaxu. Rü ngëxguma texé tümamaã naxuegugu na tüxü yamèxgüxü, rü noxtacüma tá tüxü nimèxgü. Rü ngëmacèx ya yixema Tupanaãrü duũxügü ixigüxe, rü woo tacü rü guxchaxü tüxü ngupetügu, rü tanaxwèxe na

yaxna namaã taxĩnüëxũ rü tayaxõgüamaxũ.

11 RÜ yemawena nüxũ chadau ga wüxi ga to ga ngoxo ga taxrechatacuxrexũ ga waixũmüãnewa íxũxũ. RÜ yema naxchatacuxre rü ñoma carneruchatacuxrerüũ nixĩ. Natürü ga naga rü wüxi ga coya ga taxüchixügarüũ nixĩ.

12 RÜ yexguma yema nüxĩraüxũ ga ngoxopëxewa nayexmagu, rü naxrüütama napora. RÜ ñoma ga naãnemaã inacuëx, rü nanamu ga ñoma ga naãnewa maxëxũ ga duüxüğü na yema nüxĩraüxũ ga ngoxo ga ixëãrü oxriáxüxũ na yacuëxüüğüxüçèx.

13 RÜ yema ngoxo nanaxü ga taxũ ga cuëxruüğü ga duüxüğü tama nüxũ cuáxũ na naxüğüãxũ. RÜ daxüwa nanayixëë ga üxü, rü ñoma ga naãnegu nayi napëxewa ga duüxüğü.

14 Natürü ga Tupana rü tama yema ngoxona nanachuxu na ñoma ga naãnewa maxëxũ ga duüxüğüxũ nawomüxëëxũ namaã ga yema cuëxruüğü ga yema nüxĩraüxũ ga ngoxopëxewa naxüxũ. RÜ yemaãcü ga yema ngoxo rü duüxüğüxũ namu na naxüğüãxüçèx ga naxchicünèxã ga yema nüxĩraüxũ ga ngoxo ga taramaã chexexũ rü poraãcü rüxóxũ rü tama yuxũ.

15 RÜ Tupana rü tama yema to ga ngoxona nanachuxu na namaxëëãxüçèx ga yema nüxĩraüxũ ga ngoxochicünèxã. RÜ yemaãcü ga yema ngoxo rü nanamaxëë ga yema naxchicünèxã na yadexaxüçèx rü na nadaiãxüçèx ga guxüma ga yema duüxüğü ga tama nüxũ icuëxüüğüxũ.

16 RÜ yexgumarüũ ta guxüma ga duüxüğüxũ

namu na norü tügünemëxëwa rü ëxna nacatüwa nüxü na nayexmaxücëx ga wüxi ga cuèxruü ga yema ngoxoéga ixixü. Rü yemaãcü nanamu ga guxüma ga duüxügü rü woo buxü rü ëxna yaxü, rü woo duüxügü i muärü dïëruãxgüxü rü ëxna ngearü dïëruãxgüxü, rü woo duüxügü i ngearü coriãxgüxü rü ëxna duüxügü i ixãärü coriãxgüxü.

¹⁷ Rü taxucürüwa texé tumaärü tacücëx tataxe rü ëxna tumaärü tacümaã tataxe ga yexguma tumaärü tügünemëxëwa rü ëxna tümacatüwa tüxü natauxgu ga yema ngoxoéga rü ëxna yema ngoxoégarü cuèxruü ga númeru.

¹⁸ Rü ñãã orexü na icuáxücëx, rü tanaxwëxe na tüxü nangëxmaxü i tórü cuèx. Rü yíxema tüxü nangëxmaxë i tumaärü cuèx, rü name nixi i tanan-gugü i ngëma númeru i ngëma ngoxoéga ixixü. Erü ngëma númeru rü wüxi i yatüégachirëx nixi. Rü ngëma númeru rü 666 nixi.

14

Yema 144,000 ga duüxügüari wiyae

¹ Rü yemawena ichadawenü, rü nüxü chadau ga guma pecaduarü ütanücëx yücü ga guma mëxpüne ga Siõügu äeganeetügu chicü. Rü naxütawa nayexma ga 144,000 ga duüxügü ga nacatüwa ixãegaxü namaã ga guma pecaduarü ütanücëx yücüéga rü Nanatü ya Tupanaëga.

² Rü ñuxüchi nüxü chaxinü ga wüxi ga naga ga tagaxü ga daxüguxü ga naãnewa inaxüxü ga ñoma taxü i cotüna i chuxchuxügarüü ixixü rü ñoma po-raãcü yaduruanexürüü ixixü rü ñoma muxüchixü i duüxügü i arpawa ípaxetaxüxürüü ixixü.

³ Rū yema 144,000 ga duŭxŭgŭ rŭ nagu nawiyaegŭ ga wŭxi ga yexwacaxŭxŭ ga wiyae napĕxewa ga Tupanaārŭ tochicaxŭ rŭ napĕxewa ga yema āgŭmŭcŭ ga daxŭcŭāx ga maxĕxŭ rŭ napĕxewa ga yema 24 ga āĕxgacŭgŭ. Rŭ taxucŭrŭwama texé ga togue nŭxŭ tacuèxéga ga yema wiyae. Rŭ yema 144,000 ga duŭxŭgŭxicatama nixĭ ga nŭxŭ cuèxgŭxŭ. Rŭ yema nixĭ ga Tupana ñoma ga naānewa deixŭ na namaxĕxĕēāxŭcèx.

⁴ Rŭ yema nixĭ ga duŭxŭgŭ ga tama ñoma ga naāneārŭ ngúchaŭ i chixexŭmaā nŭgŭ āŭāchiarŭ maxŭāxgŭxŭ rŭ tama nŭxŭ rŭxoexŭ na Tupanaāxŭ yaxōgŭāxŭ. Rŭ nŭmagŭ rŭ yima Tupana Nane ga pecaduarŭ ŭtanŭcèx yucŭwe narŭxĭ i ngextá ínaxŭxŭwa. Rŭ yemagŭ nixĭ ga ñoma ga naānecŭāxtanŭwa nŭxira Tupana naxcèx taxexŭ na noxrŭ rŭ Naneārŭ duŭxŭgŭ i ŭnŭnexŭ yixĭgŭxŭcèx.

⁵ Rŭ yematanŭwa rŭ taguma texé nŭxŭ taxĭnŭ na doraxŭ yaxugŭxŭ, erŭ Tupanapĕxewa rŭ nataxuma i norŭ chixexŭ.

Orearŭ ngeruŭgŭ ga daxŭcŭāxārŭ orechiga

⁶ Rŭ ñŭxŭchi nŭxŭ chadau ga wŭxi ga to ga orearŭ ngeruŭ ga daxŭgŭxŭ ga naānegu íxexeŭxŭ ga iyangexŭ ga Tupanaārŭ ore i guxŭgutáma íxĭxŭ, na guxŭ i nachíŭānecŭāxgŭmaā rŭ nagŭxŭraŭxŭ i duŭxŭgŭmaā rŭ guxŭma i duŭxŭgŭ i nagŭxŭraŭxŭ i nagawa idexagŭxŭmaā nŭxŭ yaxuxŭcèx. Rŭ yemaācŭ inayangē ga yema Tupanaārŭ ore na guxŭma i ñoma i naānewa maxĕxŭ i duŭxŭgŭmaā nŭxŭ yaxuxŭcèx.

7 Rû tagaãcü ñanagürü:

“¡Nüxü pemuñe ya Tupana rû nüxü picuèxüügü! Erü marü nawa nangu na guxüma i duñxüguna naçaxü. ¡Rû nüxü picuèxüügü ya yima naxücü i daxüguxü i naãne rû ñoma i naãne rû taxtü i taxü rû guxüma i natüxacügü!” ñanagürü.

8 Rû yemawena nangox ga to ga orearü ngeruñ ga daxücüãx, rû ñanagürü:

“Marü nagu nayarüchixe ya yima ñãne ya taxüne ya Babiróniã, rû nagu napogüe rû nayawètaügüxëe ya norü ñgü. Yerü yema ñãnecüãx rû nanachixexëe ga guxüma ga to ga nachiuñãnecüãx ga duñxügü. Rû guxüma ga yema duñxügüxü namu na naxüguãxücèx ga yema chixexü ga guma ñãnewa naxügüxü ga Tupanapëxewa poraãcü chixexü”, ñanagürü.

9-10 Rû yemawena nangox ga to ga orearü ngeruñ ga tagaãcü ñaxü:

“Ngëxguma chi texé nüxü icuèxüügü i ngëma ngoxo rû naxchicünèxãxü ticuèxüügü rû tügü itaxãxgu na tümacatüwa rû éxna tümamëxëwa ngëma ngoxoégamaã tacuèxruñãxü, rû Tupana rû poraãcüxüchi tá tüxü napoxcu namaã i ngëma poxcu i guxüärü yexera ixixü i nümatama ya Tupana norü numaã namexëëxü. Rû üxümaã rû azufre i iyauraxümaã tá ngüxü tüxü ningexëe napëxewa i norü orearü ngeruñgü rû napëxewa ya yima Nane ga pecaduarü ütanücèx yucü.

11 Rû naëma ya yima üxü ya nawa Tupana ngüxü tüxü ingexëene, rû guxügutáma ngëma nicaixqueecha. Rû bai i írarüwa tá tüxü narüna i ngëma ngüxü ya yíxema ngëma ngoxoxü rû ngëma ngoxochicünèxãxü icuèxüügüxe rû tügü ixãxë na

ngẽma ngoxoégamaã taxãegaxũ. Rũ bai i ngunecũ rũ bai i chũtacũ tá tũxũ narũna i ngẽma ngũxũ”, ñanagũrũ.

12 Rũ ngẽmacèx ya yíxema Tupanaãrũ duũxũgũ ixĩgũxe rũ norũ orega ñnũẽxẽ rũ Ngechuchuaxũ yaxõgũxe, rũ name nixĩ na yaxna namaã taxĩnũẽxũ rũ tayaxõgũamaxũ ega woo tacũ rũ guxchaxũ tũxũ ngupetũgu.

13 Rũ ñũxũchi nũxũ chaxĩnũ ga wũxi ga naga ga daxũguxũ ga naãnewa inaxũxũ ga ñaxũ choxũ:

“¡Naxũmatũ i ñaã ore i tá cumaã nũxũ chixuxũ! Rũ ñũxmaũcũ tá tataãẽgũ ya yíxema tórũ Cori-axũ meã yaxõgũãcũma yuexe. Erũ Tupanaãẽ i Üünexũ rũ ñanagũrũ: ‘Ngũ, ngẽmããcũ tá tataãẽgũ ya yíxema, erũ tá itarũngũẽ nũxna i tũmaãrũ puracũgũ. Rũ ngẽma mexũ i taxũgũxũ rũ tũmamaã wũxigu daxũguxũ i naãnewa tá naxũ’”, ñanagũrũ.

Ñoma i naãnewa nanade i ngẽma duũxũgũ i Tupanaãrũ ixĩgũxũ

14 Rũ ñũxũchi ichadawenũ rũ nũxũ chadau ga wũxi ga caixanexũ ga cómũxũ. Rũ yema caixanexũetũwa narũto ga Tupana Nane ga duũxũxũ ixĩcũ. Rũ naẽruwa nayexma ga wũxi ga norũ ngèxcuerũ ga uirunaxcèx. Rũ namẽxwa nayexma ga wũxi ga cũxchi ga ñapomaguxũ ga tẽxechixũ.

15 Rũ Tupanapatawa ñnaxũxũ ga wũxi ga to ga orearũ ngerũ ga tagaãcũ ñaxũ nũxũ ga guma caixanexũetũwa rũtocũ:

“¡Inaxũgũ na cunadexũ i ngẽma duũxũgũ i cuxrũ ixĩgũxũ! Erũ marũ nawa nangu na cugũxũtawã cunagagũxũ, erũ ngẽma curũ duũxũgũ i ñoma i

nañnewa ngëxmagüxü rü ínamemare na cunadexü”, ñanagürü.

16 RÜ ñuxüchi ga guma yema caixanexüetüwa rütocü rü ñoma trigu i buxuxürüü nañneetügu ngĩmaã nayabuãchi ga norü cüxchi. RÜ nanade ga yema norü duüxügü ga ñoma ga nañnewa yexmagüxü.

17 RÜ ñuxüchi daxüguxü i nañnewa ngëxmane ya Tupanapatawa ínaxüxü ga wüxi ga to ga orearü ngeruü ga nüxü nayexmacü ga wüxi ga cüxchi ga ínapomagüxcü ga tēxechüxcü.

18 RÜ yema pumaraarü gutēxeruütaxmüwa ínaxüxü ga wüxi ga to ga orearü ngeruü ga üxümaã icuáxü. RÜ nüma rü tagaãcü ñanagürü nüxü ga yema to ga orearü ngeruü ga yema cüxchi ga ínapomagüxcü ga tēxechüxcü nüxü yexmaxü:

“¡Inaxügü na cunadexü i ngēma duüxügü i yéa nañnewa ngëxmagüxü i tama Tupanaärü ixīgüxü! Erü marü nawa nangu na Tupana napoxcuexü”, ñanagürü.

19 RÜ yema orearü ngeruü rü ñoma ga nañneetügu ngĩmaã nayabuãchi ga norü cüxchi. RÜ nayadexechi ga yema duüxügü ga tama Tupanaärü ixīgüxü ga ñoma ga nañnewa yexmagüxü. RÜ wüxi ga taxü ga nachicagu nanawocu na yexma Tupana norü numaã nadèixüçèx, ñoma ubagü imèixtüüxürüü.

20 RÜ yema nachica ga ñañeärü íxpemawa yexmaxügu nanadai. RÜ guma nagü ga yéma íyaxüchicü, rü 300 ga kilómetru inayarübaichi, rü wüxi ga metruarü ngäxü nixí ga norü mátama ga guma nagü.

15

Tupanaãrũ orearũ ngeruũgũ ga nüxũ nayexmaxũ ga 7 ga poxcuruũgũ

¹ Rũ ñuxũchi ga daxũguxũ ga naãnewa rũ nüxũ chadau ga wüxi ga to ga taxũ ga cuèxruũ ga namaã iþaixãchixũ. Rũ nayexma ga 7 ga orearũ ngeruũgũ ga daxũcũãx ga nüxũ yexmagũxũ ga 7 ga poxcuruũ. Rũ yema poxcugu nixĩ ga yagũxũ ga norũ nú ga Tupana.

² Rũ yexgumarũ ta nüxũ chadau ga ñoma wüxi ga nanaxtaaétüwaraũxũ ga woruarũ iyauretücüxũ ga üxüema nawa inachixũ. Rũ yéma tayexmagũ ga guxema nüxũ rüyexeraxe ga yema ngoxo rũ yema ngoxochicünèxã rũ yema ngoxoéga rũ yema número ga yema ngoxoéga ixĩxũ. Rũ yema nanaxtaaétüraũxũgu tachigũ. Rũ tüxũ nayexmagũ ga tümaãrũ paxetaruũgũ ga arpa ga Tupana tüxna ãxũ.

³ Rũ nagu tawiyaegũ ga Moĩché ga Tupanaãrũ duũxũ ixĩcüarũ wiyae. Rũ yexgumarũ ta nagu tawiyaegũ ga yema wiyae ga guma Tupana Nane ga pecaduarũ ütanücèx yucüarũ ixĩxũ ga ñaxũ:

“Pa Torũ Cori ya Tupana ya Guxũãrũ Yexera Poracũx, nataxũchi rũ namexèchi i guxũma i ngẽma cuxũxũ. Rũ cuma rũ guxũgutãma guxũma i nachiuãnegüarũ ãëxgacü quixĩ. Rũ cuma rũ aixcüma meãma namaã icucüèx rũ taguma quidora.

⁴ ¿Rũ texé tãütãma cuxũ tamuũ, Pa Corix? ¿Rũ texé tãütãma cuxũ ticuèxüũ? Erũ cuma rũ cuxicatama nixĩ i üünecü quiĩxũ. Rũ guxũma i nachiuãnecũãx rũ nuã tá naxĩ, rũ tá cuxũ nicuèxüũgũ. Yerũ marũ nüxũ nadaugũ na quixaixcümaxũ i guxũma

i ngēma nūxū quixuxūwa rü aixcūma mea cunan-gugūxū i guxūma i ngēma chixexū ügūxū rü ngēma mexū ügūxū”,

ñanagürü ga yema wiyae.

⁵ Rü yemawena ichadawenü rü nūxū chadau ga daxūguxū ga naānewa na yawāxnaxū ga yema nachica ga üünexū ga Tupanapataarü aixepewa yexmaxū ga ngexta namaā ínanguxūgūxūwa ga guma nuta ga Tupanaārü mugü nagu umatücü.

⁶ Rü guma Tupanapatawa ínachoxū ga yema 7 ga orearü ngeruügü ga daxūcüāx ga nūxū nayex-magūxū ga yema 7 ga poxcuruügü. Rü naxchiru ga mexēchixūmaā rü iyauracüüxūmaā nixāxchiru. Rü yema norü goyeremüügü rü uirunaxcèx nixī.

⁷ Rü ñuxūchi wüxi ga yema āgümücü ga daxūcüāx ga maxūxū, rü wüxichigü ga yema 7 ga orearü ngeruügüna nanaxā ga wüxi ga copa ga uirunaxcèx ga Tupana ya guxūguma maxēchacüarü nu i āücūmaxūmaā ixāācuxū.

⁸ Rü guma Tupanapata rü namaā naxāācu ga yema caixema ga Tupana ya mexēchicü rü poracüwa ne üxū. Rü taxucürüwama texé yexma taxücu ñuxmata nagú ga yema 7 ga poxcuruü ga yema 7 ga orearü ngeruügüaxū yexmaxū.

16

copagü ga Tupanaārü numaā ixāācuxūchiga

¹ Rü ñuxūchi nūxū chaxīnü ga wüxi ga naga ga tagaācü guma Tupanapatawa inaxūxū ga ñaxū nūxū ga yema 7 ga orearü ngeruügü:

“¡Ngema pexī, rü naāneetüwa peyabagüācu i ngēma 7 i copagü i Tupanaārü nu i āücūmaxūmaā ixāācuxū!” ñanagürü.

² Rū yéma naxũ ga wüxi ga Tupanaãrũ orearũ ngeruũ, rü naãneetũgu nayabaãcu ga norũ copa. Rũ guxũma ga duũxũgũ ga yema ngoxoégamaã ixãegaxũ rü yema ngoxochicünèxãxũ icuèxũũgũxũ, rü nawa inayarũgogũ ga taixna ga nguxuchixũ ga taguma ixẽxũ.

³ Rũ yema norũ taxre ga orearũ ngeruũ, rü taxũ ga taxtũetũgu nayabaãcu ga norũ copa. Rũ nagũxũ nananguxuchi ga dexá, rü ñoma wüxi i duũxũ i texé imáxũgürũ nixĩ ga dexá. Rũ guxũma ga tacũ ga taxtũwa maxẽxũ rü nayue.

⁴ Rũ yema norũ tomaẽxpũx ga orearũ ngeruũ rü natũgũetũgu rü natũxacũgũetũgu nayabaãcu ga norũ copa. Rũ guxũma ga yema natũgũ rü natũxacũgũ, rü nagũxũ nanacèxichi.

⁵ Rũ ñuxũchi nüxũ chaxĩnü ga yema Tupanaãrũ orearũ ngeruũ ga guxũma ga dexámaã icuáxũ ga ñaxũ:

“Pa Torũ Cori ya Tupana ya Üünecũ ya Woetama Yexmaẽchacũ rü Ñuxma Ngẽxmaẽchacũ, cuma rü wüxi i mexũ cuxũ na ngẽmaãcũ dexá nagũxũ cunacèxichixẽẽxũ naxchaxwa i ngẽma duũxũgũ.

⁶ Yerũ nümagũ rü nanadai ga yema curũ duũxũgũ rü curũ orearũ uruũgũ, rü inanaba ga nagũ. Rũ ñuxma i cuma rü wüxi i mexũ nixĩ i cuxũxũ na ngẽma dexá nagũxũ cunacèxichixẽẽxũ na nawa naxaxegũxũcèx. Yerũ yema nixĩ ga yema nanaxwèxegũxũ rü yemacèx nixĩ ga curũ duũxũgũxũ nadèixũ”, ñaxũ.

⁷ Rũ nüxũ chaxĩnü ga wüxi ga naga ga yema pumaraarũ gutèxeruũtaxmüwa inaxũxũ ga ñaxũ:

“Ngũ, Pa Cori ya Tupana ya Guxũãrũ Yexera

Poracüx, aixcüma nixĩ i namexũ i ngẽma cuxüxũ”, ñaxũ.

⁸ Rũ yema norũ ägümücü ga orearũ ngeruũ rũ üèxcüétügu nayabaäcu ga norũ copa. Rũ yemaäcü poraäcü nananaiemaxëë ga üèxcü na yema norũ naĩemaxũmaã ínaguãxücèx ga duũxügü.

⁹ Rũ guxũma ga duũxügü rũ poraäcü nüxũ nanguxema, natürü tama nüxũ narüxoe ga nacüma ga chixexũ rũ tama Tupanaxũ nicüèxüügü. Rũ naguxchigagüama namaã ga Tupana ya guxũma i ngẽma poxcuruũmaã icuácü.

¹⁰ Rũ yema norũ wüximëëxpüx ga orearũ ngeruũ, rũ yema ngoxoarũ tochicaxüetügu nayabaäcu ga norũ copa. Rũ guxũwama ga ngextá äëxgacü íyĩxũwa ga yema ngoxo, rũ naxëäne. Rũ yema na poraäcü nüxũ nangúxũ ga duũxügü, rũ nügü nangõörü conüãxgü.

¹¹ Natürü woo yemaäcü nüxũ na nangupetüxũ ga duũxügü, rũ tama nüxũ narüxoechaũ ga yema chixexũ ga naxügüxũ. Natürü yema na poraäcü nüxũ nangúxũ ga norũ taixnagü, rũ naguxchigagüama namaã ga Tupana ya daxügücü.

¹² Rũ yema norũ 6 ga orearũ ngeruũ, rũ yema taxtü ga Euférateétügu nayabaäcu ga norũ copa. Rũ inayache ga yema taxtü na wüxi ga nama na yüüxcèx naxcèx ga yema nachiüãnegüarü äëxgacügü ga üèxcü íyarügoxũwa ne íxũ.

¹³ Rũ nüxũ chadau rũ yema coyaãxwa, rũ yema nüxĩraũxũ ga ngoxoèxwa, rũ yema to ga ngoxo ga yema orearũ uruũnetaèxwa, rũ wüxièxwachigü ínaxũxũ ga wüxi ga naãë ga chixexũ ga ñoma cururüũ íxixũ.

¹⁴ Rũ yema ngoxoãëgü nixĩ ga naxügüxũ ga

yema taxũ ga cuèxruũgũ ga duũxũgũ taxucürüwa ügũxũ. Rũ yema ngoxogũ rũ ínachoxũ na nangutaquẽxexẽẽgũãxũcèx i guxũma i ñoma i naãnewa ngẽxmagũxũ i nachiuãnegüarũ ãẽxgacügũ na Tupana ya Guxũãrũ Yexera Poracũmaã nügũ nadaixũcèx i ngẽxguma nawa nanguxgu i naãneãrũ gux.

¹⁵ Natürũ dücax, rũ pexuãẽgũ erũ tórũ Cori ya Ngechuchu ya Cristu rũ ñanagürũ:

“Choma rũ ngürũãchi taxúetáma choxũ ínanguxẽẽyane íchangu, ñoma wüxi i ngítèxáxũ ínguxũrũũ. Rũ tataãẽ ya yíxema ímemarexe ñoma wüxi i duũxũ i naxchiru ímexẽẽxũrũũ na tama tangexchiruxũcèx rũ taxãnexũcèx i ngẽxguma íchanguxgu”, ñanagürũ.

¹⁶ Rũ yema ngoxogũ, rũ nanangutaquẽxexẽẽ ga guxũma ga ñoma ga naãnewa yexmagũxũ ga nachiuãnecũãxgüarũ ãẽxgacügũ. Rũ yema nachica ga nawa nangutaquẽxegũxũ, rũ Armaguedóũgu naxãega i Yudíugũgawa.

¹⁷ Rũ yema norũ 7 ga orearũ ngeruũ, rũ buanecügumare nayabaãcu ga norũ copa. Rũ guma Tupanapata ya daxũguxũ i naãnewa ngẽxmanewa inanaxũ ga wüxi ga naga ga tagaxũ ga yema Tupanaãrũ tochicaxũwa inaxũxũ ga ñaxũ:

“Marũ ningũ”, ñaxũ.

¹⁸ Rũ nibèixbẽxane, rũ poraãcü nicuxcuane, rũ niduruane. Rũ poraãcü naxĩãxãchiane. Rũ noxri Tupana duũxũgũxũ üxgumama rũ taguma nayexma ga wüxi ga ããxãchiane ga yemarũũ poraxũ.

¹⁹ Rũ guma ããne ga taxũne ga Babiróniã, rũ tomaẽxpũxgu ningũxyeane. Rũ guma ããnegũ ga

ñoma ga naãnewa yexmagüne rü niwèxtaũgü. Rü Tupana rü nüxna nacuaxãchi ga guma ããne ga Babiróniããrũ chixexũ. Rü yemacèx norũ numaã poraãcũ nanapoxcu ga guma ããne, yerũ poraãcũxũchi namaã nanu.

²⁰ Rü guxũma ga capaxũgü rü guxũnema ga mèxpũnegü, rü inayarũxogü.

²¹ Rü daxũwa narũyi ga gáuxũ ga itapütaxũ, rü duũxũgüétügu nayi. Rü wũxipütachigü ga yema gáuxũ, rü 40 ga kilogu nixĩ ga nayaxũ. Rü ga duũxũgü rü Tupanamaã naguxchigagü nagagu ga yema poxcuruũ ga gáuxũ, yerũ poraãcũ nüxũ nangux ga yema poxcu ga Tupana namaã napoxcuxũ.

17

Ããne ga Babiróniã ga wũxi ga nge ga ngẽãxũchicũgu ixuxũne

¹ Rü yema 7 ga orearũ ngeruũgü ga nüxũ yexmagũxũ ga 7 ga copagü, rü yematanũwa rü wũxi ga orearũ ngeruũ, rü chauxcèx nixũ, rü ñanagürũ choxũ:

“¡Nuã naxũ! Rü tá cuxũ nüxũ chadauxẽẽ i tacü tá nixĩ i ngĩrũ poxcu i ngẽma nge i ngeãxũchicü i taxũ i dexágüétüwa rütõxcü.

² Rü ñoma i naãnewa ngẽxmagũxũ i nachiũãnegũarũ ãẽxgacügü, rü ngĩmaã namaxẽ, rü yemaãcũ poraãcũ chixexũ naxügü. Rü guxũma i ñoma i naãnecũãx, rü ngĩrũ chixexũ nüxna naxüe”, ñanagürũ.

³ Rü yexguma Tupanaãẽ i Üünexũ yemaãcũ choxũ ngoxetũxẽẽgu, rü yema orearũ ngeruũ rü wũxi ga nachica ga ngextá taxúema íxãpataxũwa

choxũ naga. Rũ yema ngĩxũ chadau ga wũxi ga nge ga wũxi ga ngoxo ga dauxũetũwa rũtoxcũ. Rũ yema ngoxo rũ guxũwama naxãegaxũne, rũ yema naegagũ rũ Tupanamaã naguxchiga. Rũ 7 nixĩ ga naẽru rũ 10 ga naxchatacuxre.

⁴ Rũ yema nge rũ wũxi ga naxchiru ga dauxracharaxũ rũ dauxũmaã ixãxchiru. Rũ uirumaã rũ nutagũ ga mexẽchicũmaã ingãxãẽ. Rũ ngĩxmẽxwa ngĩxũ nayexma ga wũxi ga copa ga uirunaxcèx. Rũ yema copa rũ namaã naxããcu ga nagúxũraũxũ ga yema Tupanapẽxewa chixexũ rũ nagúxũraũxũ ga chixexũgũ ga yema nge uxũ.

⁵ Rũ ngĩcatũgu naxũmatũ ga wũxi ga naega ga taxúema nũxũ cuáxũ na ñuxũ ñaxũchiga yĩxũ. Rũ yema naega rũ ñanagũrũ:

“Rũ yima Babiróniã rũ guxũma i ngema duũxũgũ i chixexũ ügũxũ i ñoma i naãnewa maxẽxũarũ mamá nixĩ”, ñanagũrũ.

⁶ Rũ ngĩxũ chadau ga yema nge ga na nangãxũxũ namaã ga guma nagũ ga yema duũxũgũ ga Tupanaãrũ ixĩgũxũ rũ yema duũxũgũ ga Ngechucharũ orexũ na yaxugũxũcèx dèixũ. Rũ yexguma yemaxũ chadèuxgu, rũ chabaixãchi.

⁷ Rũ yexguma ga yema orearũ ngeruũ rũ ñanagũrũ choxũ:

“¿Tacúcèx cubaixãchi? Dücèx, tá cumaã nũxũ chixu na tacũchiga yĩxũ i ngẽma nge, rũ tacũchiga yĩxũ i ngẽma ngoxo i 7 eruxũ rũ 10 chatacuxrexũ i naetũwa natoxũ.

⁸ Rũ ngẽma ngoxo i nũxũ cudauxũ, rũ yema nixĩ ga nuxcũmaxũchi maxchiréxũ natürũ ñuxma rũ marũ yuxũ rũ ngẽma ãxmaxũ i taxuguma iyacuáxũwa ngẽxmaxũ. Natürũ paxa tá ngẽma

íxũxũxũ, rü ñũxũchi ngẽma nachica i guxũgutáma nagu napoxcuxũwa tá ũxũ. Rũ ngẽma ngox-oma ã tá nabaixãchiãëgũ i ngẽma duũxũgũ i ñoma i naãnewa maxẽxũ i tama nawa ngoxégagũxũ i ngẽma Tupanaãrũ popera i noxritama naãne ixũgũgu Tupana nagu yawũgũxũ i ngẽma duũxũgũ i nüxũ nangẽxmaxũ i maxũ i taguma gũxũ. Rũ nümagũ i ngẽma duũxũgũ rü aixcũma tá namaã nabaixãchiãëgũ i ngẽxguma nüxũ nadaugũgu i ngẽma ngoxo ga nuxcũmaxũchi maxchiréxũ rü yuxũ natürü wena táxarü ínguxũ.

⁹ Rũ ñaã nixĩ i wüxi i ore naxcèx i ngẽma duũxũgũ i nüxũ natauxchaxũ na nüxũ nacuèxgũxũ. Rũ ngẽma 7 i naëru i ngẽma ngoxo, rü yima nixĩ ya 7 ya mèxpũnechiga. Rũ yima 7 ya mèxpũneetüwa nixĩ i natoxũ i ngẽma nge. Rũ ngẽxgumarũ ta i ngẽma naërugũ, rü 7 i nachiũãnegüarü ãëxgacügũchiga nixĩ.

¹⁰ Rũ wüximẽëxpũx i ngẽma ãëxgacügũ rü marü togü nüxũ narüyexeragũ, rü ñũxma rü marü tama ãëxgacügũ nixĩgũ. Rũ ngẽma norü 6 i ngẽma ãëxgacügũ, rü nüma rü ñũxma rü ãëxgacü nixĩ. Rũ ngẽma norü 7 tá nixĩ i yixcũra ínguxũ. Natürü ngẽxguma ínanguxgu i ngẽma norü 7 i nawa iyacuáxũ i ngẽma ãëxgacügũ, rü paxaãchimare tá nixĩ i ãëxgacü yĩxũ.

¹¹ Rũ ngẽma ngoxo ga nuxcũmaxũchi maxchiréxũ rü ñũxma rü marü yuxũ, rü ngẽma nixĩ i norü 8 i ngẽma ãëxgacügũ. Rũ nüma rü ngẽma 7 tanũxũ nixĩ. Natürü i nüma rü ngẽma nachica i guxũgutáma nagu napoxcuxũwa naxũ.

¹² Rũ ngẽma 10 i naxchatacuxre i nüxũ cudauxũ, rü 10 i nachiũãnegüarü ãëxgacügũchiga

nixĩ. Natürü i nümagü rü tauta inanaxügüe na duũxügümaã inacuèxgüxũ. Natürü yixcûra tá nanayauxgü i pora na wüxítátama i ora ngẽma ngoxomaã wüxigu ãëxgacügü yixĩgüxũcèx.

13 Rü ngẽma 10 i ãëxgacügü rü wüxigu nagu narüxĩnũẽ na ngẽma ngoxona naxãgüãxũcèx i norü pora, na ngẽma ngoxo namaã icuáxũcèx.

14 Rü ñuxũchi i ngẽma ãëxgacügü rü ngẽma ngoxo rü tá nügü nadai namaã ya yima Tupana Nane ga pecaduarü ütanücèx yucü. Natürü ya yima Tupana Nane rü tá nüxũ narüyexera, erü nûma rü guxũ i corigüarü Cori nixĩ, rü guxũ i nachiũãnegüarü ãëxgacügüarü ãëxgacü nixĩ. Rü yíxema namücügü ixĩgüxe, rü yíxemagü tixĩgü ya Tupana tüxũ dexe rü tümacèx naçaxe. Rü tümagü rü aixcûma naga taxĩnũẽ”, ñanagürü choxũ.

15 Rü yema orearü ngeruũ rü ñanagürü ta choxũ:

“Ngẽma taxũ i dexá i nüxũ cudaduxũ i naetüwa natoxũ i ngẽma nge i ngẽãëxũchicü, rü nagüxũraũxũ i duũxügüchiga nixĩ, rü guxũma i duũxügü i to i nagawa idexagüxũchiga nixĩ, rü guxũma i nachiũãnecüãxgü i duũxügüchiga nixĩ.

16 Rü ngẽma 10 i naxchatacxre i nüxũ cudaduxũ i nüxũ ngẽxmaxũ i ngẽma ngoxo, rü tá ngẽma nge i ngẽãëxũchicüchi naxaie. Rü tá ngẽma ngena nanapuxũ i guxũma i tacü i ngĩxũ ngẽxmaxũ, rü ngẽmaãcü ngexchiruãcûma tá ngẽxma irüxãũx. Rü tá ngĩxũ nangõxgü, rü üxüwa tá ngĩxũ nigugü.

17 Yerü ga Tupana rü yema 10 ga ãëxgacügüxũ nagu narüxĩnũẽxẽẽ na naxügüãxũcèx i ngẽma nanaxwèxexũ i nûma ya Tupana. Rü ngẽmacèx i ngẽma ãëxgacügü, rü tá wüxigu nagu narüxĩnũẽ na

ngẽma ngoxoxũ naporaxẽẽgũxũ na norũ ãẽxgacũ yĩxũcèx ñuxmatáta Tupana yanguxẽẽ i ngẽma nũxũ yaxuxũ.

¹⁸ Rũ ngẽma nge i ngĩxũ cudèuxcũ, rũ yima nixĩ ya yima ããne ya taxũne ya guxũma i nachiuãnegũarũ ãẽxgacũgũmaã icuáxũne”, ñanagũrũ.

18

Nagu nayarũchixe ga ããne ga Babiróniã

¹ Rũ yemawena nũxũ chadau ga wũxi ga to ga orearũ ngeruũ ga daxũguxũ ga naãnewa írũxĩxũ ga taxũ ga ãẽxgacũ ixĩxũ. Rũ yema orearũ ngeruũãrũ yauracũxũmaã nangóone ga ñoma ga naãne.

² Rũ tagaãcũ ñanagũrũ:

“Marũ nagu nayarũchixe ya yima ããne ya Babiróniã ya itaégacũxũne. Rũ ñuxma rũ ngoxogũchiũ nixĩ rũ nagúxũraũxũ i naãe i chixexũgũchiũ nixĩ. Rũ ñuxma rũ ngẽxma naxãchiũ i nagúxũraũxũ i ngurucugũ rũ werigũ i chixexũ i duũxũgũ naxchi aiexũ.

³ Yerũ guxũma ga nachiuãnecũãxgũ, rũ guma ããneãrũ chixexũ nũxna naxũe. Rũ norũ ãẽxgacũgũ, rũ yema poraãcũ chixri namaxẽ. Rũ guxũma ga ñoma ga nachiuãnecũãxgũ ga taxetanũxũgũ, rũ nũgũ namuãrũ dũeruãxẽẽgũ namaã ga yema ããneãrũ yemaxũgũ ga tama Tupanapẽxewa mexũ”, ñanagũrũ.

⁴ Rũ ñuxũchi nũxũ chaxĩnũ ga to ga naga ga daxũguxũ ga naãnewa inaxũxũ ga ñaxũ:

“¡Dũcèx i guxãma i pema ya chorũ duũxũgũ ixĩgũxe, rũ ípechoxũ nawa ya yima ããne na tama

ngẽma ãnecũãxrũ pipecaduãgxũcèx rü tama nãgu peyixũcèx i ngẽma poxcu i tá yima ãnewa nguxũ!

⁵ Erü ngẽma ãnecũãxãrũ pecadugü, rü nügüétüwa narünucue, rü düxwa marü daxüguxũ i naãnewa nãngu. Rü ñuxma ya Tupana rü nüxna nacuèxãchi i ngẽma chixexũ i naxügüxũ, rü ngẽmacèx tá yima ãnexũ napoxcu.

⁶ Rü ngẽma poraãcü chixexũ na naxügüxürũ, rü ngëxgumarũ tá ta nixĩ na chixexũmaã nüxũ penaxütanüxũ i pemax. ;Rü ñuxma na ngẽma ãnecũãx togümaã chixexũ naxügüxũ, rü taxreëxpüxcüna tá penachixexëë i pemax! ;Rü ngẽma chixexũ ga yema ãnecũãx togücèx mexëëgüxũ, rü pema rü taxreëxpüxcüna tá ngẽmaãcü naxcèx penamexëë!

⁷ ;Rü ngẽma na nügü yacuèxüügüxũ rü mexëchixüwa na namaxëxũ, rü ngëxgumarũ tá ta nixĩ na ngüxũ nüxũ pingexëëgüxũ rü ngechaũ nüxũ pingexëëgüxũ! Erü ñuxma i ngẽma ãnecũãx rü nügüãëwa ñanagürügü: ‘Yixema rü ñoma wüxi i ãëxgacürũ mexëchixüwa tangëxmagü. Rü tagutáma wüxi i yutexürũ tangechaügü’, ñanagürügü nügüãëwa i ngẽma ãnecũãx.

⁸ Rü ngẽmacèx tá nixĩ i wüxítatama i ngunexügu ínãnguxũ i ngẽma ãneãrũ poxcuruũ. Rü ngẽma ãnecũãx rü ngüanemaã tá nayue, rü poraãcü tá nangechaügü, rü poraãcü taiya tá nüxũ nangux, rü norü ãne rü üxümaã tá nigu. Erü naporaxüchi ya yima Tupana ya guxũãrũ Cori ixĩcü i ngẽma ãnexũ poxcücü”, ñanagürü ga yema nãga.

⁹ Rü ngẽma nachiũãnegüarü ãëxgacügü ga yema

ĩānewa poraācū chixri maxēxū rü mexēchixūwa yexmagūxū, rü tá poraācū norü ngechaūmaā yima ĩānecēx naxauxe i ngēxguma nüxū nadaugügu i ngēma üxüema i namaā yaxaxū.

¹⁰ Natürü ngēma āēxgacügü rü ngēma poxcuxū na namuūēxūchēxwa rü tá yaxūwa nüxū narüdaunü, rü ñanagürügü tá:

“Cungechaütümüü, Pa Itaégacüxüne ya ĩane ya Babirónia ya Guxū i Nachiūñnegümaā Porachirénex. Erü wüxitama i oragu cuxcēx ínangu i curü poxcu”, ñanagürügü tá.

¹¹ Rü guxūma i ñoma i naānecūāx i taxetanüxū, rü tá poraācū norü ngechaūmaā naxcēx naxauxe ya yima ĩāne. Erü marü taxúetáma naxcēx nüxū tataxe i norü ngēmaxūgü i ngēma nangegūxū.

¹² Rü marü taxúetáma naxcēx nüxū tataxe i norü uiru, rü norü dīērumü, rü norü nutagü i mexēchixū, rü naxpügü i mexēchixū i dauxracharaxū rü idauxcharaū i ngēma nangegūxū. Rü ngēxgumarüü ta taxúetáma naxcēx nüxū tataxe i nagúxūraūxū i norü naīxchipanügü i yixixū, rü norü ngēmaxūgü i marfílnaxcēx rü mürapewa i mexēchixūnaxcēx rü cobrenaxcēx rü fierunaxcēx rü nutanaxcēx i ngēma nangegūxū.

¹³ Rü taxúetáma naxcēx nüxū tataxe i norü canela rü togü i norü üexūwemüxūgü i yixixū, rü pumaratēxe i guruū ixīxū, rü togü i pumaragü i yixixū, rü binügü rü chixūgü, rü arina i mexēchixū, rü trigu i ngēma nangegūxū. Rü ngēxgumarüü ta ngēma nanagagü i wocagü, rü carnerugü, rü cowarugü, rü autugü i cowaru itúchigūxū, rü duūxūgü i puracüruūgü. Rü ngēmaācū woo duūxēgü rü ngēma tüxū nagagü na

tümamaã nataxegüxücèx.

¹⁴ Rû ngëma taxetanüxü, rû ñanagürügü tá nüxü ya yima ñâne:

“Cuwa rû marü nataxuma i ngëma orix i curü duüxügüarü me ixixü. Rû marü nataxuma i guxüma i ngëma meruügü ga noxri cuxü yexmaxü, rû tagutáma wenaxârü cuxü nangëxma”, ñanagürügü tá.

¹⁵ Rû ngëma taxetanüxü i guxüma i ngëma orixgümaã rû ngëma meruügümaã taxegüxü rû guma ñānegu nügü muârü dīeruāxēēxüchigüxü, rû yaxüwa tátama nüxü narüdaunü ya yima ñâne, erü nüxü namuüē i ngëma poxcu i yima ñānexü üpetüxü. Rû tá poraäcü norü ngechaümaã naxauxe.

¹⁶ Rû ñanagürügü tá:

“Nangechaütümüü ya yima ñâne ya itaégacüxüne. Erü noxri rû ñōma wüxi i nge i mexēchixü i naxchiru i dauxracharaxü rû dauxcharaxümaã āxchirucü i uirumaã rû nutagü ya mexēchicümaã ngëxāēxcürüü nixī.

¹⁷ Natürü ngürüāchi nagux i guxüma i ngëma ñāneärü meruügü”, ñanagürügü tá. Rû guxüne ya wapurugüarü āēxgacügü, rû guxüma i norü duüxügü ya yima wapuruwa puracüexü, rû guxüma i duüxügü ya yima wapurugu ixü, rû guxüma i taxetanüxügü i wapurugu yarüxüüxü, rû yaxüwa tátama nayachaxgütanüāchi, rû ngëma tá nüxü narüdaunü.

¹⁸ Rû ngëxguma nüxü nadaugügu i norü caxixü na yaxaxü ya yima ñâne, rû tagaäcü tá ñanagürügü:

“Nataxuma ya nái ya ñâne ya daa ñâne ya itaxégacüxünerüü ixixüne”, ñanagürügü.

19 Rū norū ngechaŭmaã nügüétügu tá waixŭmü nagünagügü, rü tá poraãcü naxauxe, rü tagaãcü ñanagürügü tá:

“Nangechaŭtümüŭ ya yima ñãne ya itaxégacüxüne. Rū noxri rü norū yemaxŭgümaã nügü nimuãrū dñeruãxēēgü ga guxŭne ga wapurugüarū yoragü. Natürü i ñuxma rü ngürüãchi wüxi i oragutama rü inayarüxo i guxŭma i ngēma.

20 Natürü ñuxma na napoxcuxŭ ya yima ñãne, rü name nixĩ i petaãēgü i pema i daxŭguxŭ i naãnewa ngēxmagüe, rü pema i Tupana pexŭ imugüe, rü pema i Tupanaãrū orexŭ ixugüe, rü guxãma i pema i Tupanaãrū duŭxŭgü ixigüe. Erü ñuxma na napoxcuxŭ ya yima ñãne, rü ngēmaãcü Tupana pexŭ naxütanü naxcèx ga yema chixexŭ ga pemaã naxügüxŭ ga guma ñãnecŭãx”, ñanagürügü.

21 Rū ñuxŭchi wüxi ga Tupanaãrū orearü ngeruŭ ga daxŭcŭãx rü nanangenagü ga wüxi ga nuta ga taxüchicü ga ñoma tacüarü caruŭrŭŭ ixĩcü. Rū yema orearü ngeruŭ rü taxtŭ ga taxŭgu nanaña ga guma nuta ga taxüchicü, rü ñanagürü:

“Ngēxgumarüŭ tá quixĩ na icuyarüxoxŭ, Pa ñãne ya Itaxégacüxüne ya Babiróniãx, rü tagutáma texé wena cuxŭ nadau.

22 Rū tagutáma wena curü ñtamügüwa texé nüxŭ taxĩnü i paxetarüŭgü i arpagü rü quenagü rü cor-netagü. Rū ngēxgumarüŭ ta cuwa nataxütáma i puracütanüxŭgü i tacüwa puracüexŭ, rü tagutáma texé nüxŭ taxĩnü na cuwa ñapuracüexŭ i chawüarü caruŭgü.

23 Rū marü tagutáma texé nüxŭ tadau i cuwa i omü. Rū marü tagutáma texé nüxŭ taxĩnü i

ngĩgũchigaarũ petagũarũ cuxcuane. Rũ ngẽmaãcũ tá cumaã nangupetũ woo ga noxri rũ yema taxetanũxũ ga cuwa taxegũxũ rũ guxũma ga togũ ga taxetanũxũarũ yexera nixĩgũ. Rũ ngẽmacèx tá poraãcũ cupoxcu nagagu ga yema chixexũ ga namaã cunawomũxẽẽxũ ga guxũma ga togũ ga nachĩũãnecũãx ga duũxũgũ”, ñanagũrũ.

²⁴ Yerũ guma ãnecũãx ga duũxũgũ nixĩ ga nadèixũ rũ inabaxèegũxũ ga nagũ ga Tupanaarũ orearũ uruũgũ rũ yema duũxũgũ ga Tupanaarũ ixĩgũxũ rũ guxũma ga duũxũgũ ga ñoma ga naãnegu Tupanaarũ oregagu nadèixũ.

19

¹ Rũ yemawena nũxũ chaxĩnũ ga muxũma ga duũxũgũga ga daxũguxũ ga naãnewa tagaãcũ ñagũxũ:

“¡Ngĩxã Tupanaxũ ticuèxũũgũ! Erũ nũma nixĩ i tũxũ namaxẽxẽẽxũ. Rũ nũma ya tórũ Tupana nixĩ i guxũarũ yexera namexèchixũ rũ naporaxũchixũ.

² Rũ nũma rũ aixcũma meãma nanangugũ i guxũma i duũxũgũarũ maxũ, rũ aixcũma tá nanapoxcue i ngẽma chixexũ ùgũxũ. Rũ ngẽmacèx marũ nanapoxcu ya yima ããne ya itaxégacũxũne ya chixene ya norũ chixexũmaã nachixexèene i guxũma i ñoma i naãnecũãx i duũxũgũ. Rũ ñuxma i nũma ya Tupana rũ norũ duũxũgũ ga guma ãnecũãx dèixũxũ naxũtanũ”, ñanagũrũgũ.

³ Rũ ñuxũchi wenaxãrũ ñanagũrũgũ:

“¡Ngĩxã Tupanaxũ ticuèxũũgũ! Erũ ngema norũ caxixũ na yaxaxũ ya yima ããne, rũ tagutãma ngẽma nayarũxo”, ñanagũrũgũ.

4 Rū yema 24 ga ãëxgacügü rü yema ãgümücü ga daxũcũãx ga maxẽxũ rü yexma nanangũcuchitanü, rü Tupana ya norü tochicaxüwa rütocũxũ nicuèxüũgü. Rū ñanagürügü:

“Rū ngẽmaãcü yĩ. ¡Rü ngĩxã nüxũ tikuèxüũgü ya tórü Cori!” ñanagürügü.

5 Rū ñuxũchi yema tochicaxũxütawa inanaxü ga wüxi ga naga ga ñaxũ:

“Name nixĩ i tórü Tupanaxũ picuèxüũgü i guxãma i pemax Pa Buxügü rü Pa Yaxügüx i norü duũxügü na pixĩgüxũ rü nüxũ na pemuẽxũ”, ñaxũ.

Tupana Nane ga pecaduarü ütanücèx yucüarü ngĩgüarü petachiga

6 Rū ñuxũchi nüxũ chaxĩnü ga tacü ga ñoma muxüchixũ ga duũxügü idexagüxürüũ ixĩxũ ga ñoma taxũ i dexá i chuxchuxürüũ ixĩxũ ga ñoma poraãcü yaduruanexürüũ ixĩxũ ga ñaxũ:

“¡Ngĩxã Tupanaxũ tikuèxüũgü! Erü nüma ya tórü Cori ya Tupana ya guxũãrü yexera poracü, rü marü ningucuchi na guxũmaã inacuáxũ.

7 ¡Rü ngĩxã tataãëgü rü guxũ i tórü taãëmaã nüxũ tikuèxüũgü! Erü marü nawa nangu na iyangĩxũ ya yima Tupana Nane ga pecaduarü ütanücèx yucü. Rū ngẽma norü duũxügü i ñoma namèxrüũ ixĩgüxũ rü marü nügü ínimexẽëgü.

8 Rū yima Tupana Nane rü ngẽma nüxũ yaxõgüxũxũ namu na mexẽchixũ rü cómuxũ rü iyauracüxũ i naxchirumaã na yaxãxchiruxũ. Rū ngẽma naxchiru i mexẽchixũ rü ngẽma nixĩ i ngẽma duũxügüarü maxũ i mexũchiga”, ñanagürügü.

⁹ Rū ñuxũchi ga Tupanaãrũ orearũ ngeruũ, rũ ñanagürũ choxũ:

“Chanaxwèxe i cunaxümatü i ñaã ore i cumaã tá nüxũ chixuxũ: ‘Tataãëgü ya yíxema tüxna naxuxe i norü ngígüarü petawa ya yima Tupana Nane ga pecañarü ütanüçèx yucü’”, ñanagürũ. Rũ ñuxũchi ñanagürũ ta:

“Ngẽma ore i cumaã nüxũ chixuxũ, rũ Tupanaãrũ orexüchitama nixĩ”, ñanagürũ.

¹⁰ Rũ choma rũ yema orearũ ngeruüpëxegu chaxãpüxü na nüxũ chicuèxüüxüçèx. Natürũ ga nüma rũ ñanagürũ choxũ:

“¡Tãxũ i ngẽma cuyüxũ! Erü choma rũ ta Tupanaãrũ duüxũ chixĩ, ngëxgumarüü i cuma rũ cueneëgü i Ngechuchuarü ore i aixcüma ixĩxũ ixögüechaxürüü ta chixĩ. Rũ name nixĩ i Tupanaxũ quicuèxüü”, ñanagürũ. Erü ngẽma ore i Ngechuchuchiga ixĩxũ, rũ yematama ore nixĩ ga Tupanaãrũ orearü uruügü nüxũ ixugüexũ ga yexguma Tupanaãë i Üünexũ nawa ideaxgu.

Guma Tupana Nane ga cowaru ga cómüxüetügu tonagüçichiga

¹¹ Rũ ñuxũchi nüxũ chadau ga daxüguxũ ga naãne na yawãxnaxũ. Rũ yéma nangox ga wüxi ga cowaru ga cómüxũ. Rũ guma naetüwa rütocü rü Ixaixcümacü rü Aixcüma Yanguxëçcü nixĩ i naëga. Rũ nüma rü aixcüma guxüma i duüxügüarü maxüxũ nacüèx, rü aixcüma tá guxüma i ngẽma chixexũ ügüxümaã nügü nadai rü tá nanapoxcue.

¹² Rũ naxëtügü, rü ñoma üxüemarüü niyauracüü. Rũ naëruwa rü namu ga norü ngèxcueruügü.

Rü nacatügu naxümatü ga wüxi ga naega ga nüxĩcatama nüxũ nacuáxũ.

¹³ Rü wüxi ga naxchiru ga ducharaxũgu nicux. Rü naega rü Tupanaãrũ Ore nixĩ.

¹⁴ Rü nawe narũxĩ ga guxũma ga norü churragü ga daxũcũãx. Rü nümagü rü naxchiru ga imexẽchixũ rü cómuxũmaã nixãxchiru. Rü cowarugü ga icómuxũetügu naxĩ.

¹⁵ Rü naãxwa nayexma ga wüxi ga tara ga tẽxechixũ na yemamaã napíexẽãxũcèx i guxũma i ngẽma duũxũgü i tama nüxũ yaxõgũxũ. Rü tá nũma nanaxwèxexũãcũma ngẽma duũxũgũmaã inacuèx. Rü nũma rü tá poraãcü ngẽma duũxũgü i tama yaxõgũxũxũ napoxcu namaã i ngẽma poxcu ya Tupana ya Guxũxũ Rüporamaẽcü norü numaã mexẽèxũ. Rü ñoma ubagü i norü maĩxruũwa imèixtũxũrũ tá nixĩ na napoxcueãxũ.

¹⁶ Rü naxchirugu rü naperemagu naxümatü ga wüxi ga naega ga ñaxũ:

“Guxũma i nachiũãnegüarü ãẽxgacügüarü ãẽxgacü, rü guxũma i corigüarü Cori ixĩcü”, ñaxũ.

¹⁷⁻¹⁸ Rü ñuxũchi nüxũ chadau ga wüxi ga Tupanaãrũ orearü ngeruũ ga daxũcũãx ga üexcügu chixũ. Rü nũma rü tagaãcü ñanagürü nüxũ ga guxũma ga ngurucugü ga yexma ixexexũtanũxũ:

“¡Nuã pexĩ rü pengutaquẽxegü naxcèx i õna i taxũ i Tupana pexcèx mexẽèxũ na penangõxũcèx i nachiũãnegüarü ãẽxgacügümachi, rü churragüarü ãẽxgacügümachi, rü yatügü i poraxũchixũmachi, rü cowarugümachi, rü ngẽma cowaruétügu ãxũ i duũxũgümachi, rü ngẽma duũxũgü i coriãxgũxũmachi rü ngẽma ngearü

coriãxgũxũmachi rü ngẽma buxũgũmachi rü ngẽma yaxũgũmachi!" ñanagürü.

¹⁹ Rũ ñuxũchi nũxũ chadau ga yema nũxĩraũxũ ga ngoxo rü guxũma ga nachiuãnegüarü aẽxgacügü ga norü churaragũmaã yẽma ngutaquẽxegũxũ na nũgü nadẽixũcèx namaã ya yima cowaruétügu ìxũcü rü norü churaragü.

²⁰ Rũ yema nũxĩraũxũ ga ngoxo rü niyaxu. Rũ wũxigu namaã niyaxu ga yema to ga ngoxo ga orearü uruũneta ixĩxũ ga yema nũxĩraũxũ ga ngoxopẽxewa naxũxũ ga cuèxruũgü ga duũxũgü tama nũxũ cuáxũ na naxüguãxũ. Rũ yema cuèxruũgũmaã nixĩ ga nawomũxẽẽãxũ ga yema duũxũgü ga nũxũ icuèxũũgũxũ ga naxchicünèxã ga yema nũxĩraũxũ ga ngoxo rü nũgü ixãgũxũ na yema ngoxoégamaã na yaxüégagũxũ. Rũ yema nũxĩraũxũ ga ngoxo rü yema to ga ngoxo ga orearü uruũneta ixĩxũ, rü wũxigu maxẽxũma nawa nawoũ ya yima naxtaa ya üxũmaã iyaurachiüne ya azufremaã ixaxũne.

²¹ Rũ yema tara ga tẽxechixũ ga guma cowaruétüwa rütocüèxwa yexmaxũmaã nanadai ga yema ngoxogüarü ngũxẽẽruũgü ga aẽxgacügü rü norü churaragü. Rũ guxũma ga ngurucugü, rü yemamachimaã nangãxcharaũgü.

20

Chataná rü 1,000 ga taunecü ninèix

¹ Rũ yemawena nũxũ chadau ga wũxi ga Tupanaãrü orearü ngeruũ ga daxũgũxũ ga naãnewa írũxĩxũ. Rũ naxmẽxwa nayexma ga yema ãxmaxũ i taxuguma iyacuáxũãrü chawi rü ñuxũchi wũxi ga cadena.

² Rū yema Tupanaārū orearū ngeruū rū yema coyaxū niyaxu. Rū yematama coya nixī ga yema nuxcūmaūxū ga āxtape ga ngoxo ga Chataná ixīxū. Rū yema orearū ngeruū rū 1,000 ga taunecūgücèx nayanèix.

³ Rū yema orearū ngeruū rū yema āxmaxū i taxuguma iyacuáxūgu nayatèxcuchi. Rū ñuxūchi yexma meāma nanawāxtaū na nūma ga Chataná rū marū taguma wenaxārū duūxūgūxū nawomūxēēxücèx ñuxmatáta 1,000 ya taunecū ngēxma yangeā. Rū ngēxguma marū yanguxēēāgu ya yima 1,000 ya taunecū, rū tá paxaxāchi nayangēx.

⁴ Rū ñuxūchi nūxū chadau ga ñuxre ga tochicaxūgū. Rū yema tochicaxūwa tarūtogū ga guxema Tupanaxūtawa nayauxgūxe ga pora na duūxūgūxū ticagūxücèx. Rū yexgumarūū ta nūxū chadau ga naāēgū ga yema duūxūgū ga Ngechuchuarū orexū na yaxugūxücèx nadaūnaāgūxū. Rū yema nixī ga duūxūgū ga meāma nūxū ixugūxū ga Tupanaārū ore rū tama yema ngoxoxū icuèxūūgūxū rū bai ga yema ngoxochicūnèxāxū icuèxūūgūxū, rū tama nūgū ixāgūxū na nacatūwa rū ēxna naxmēxwa yema ngoxoégamaā yaxāegaxū. Rū nūxū chadau ga wena na namaxēxū, rū 1,000 ga taunecū Cristumaā wūxigu āēxgacū nixīgū.

⁵ Rū yemagū nixī ga nūxīrama írūdagūxū. Natūrū ga yema togū ga yuexū rū tāūtāma namaxē ñuxmatáta yima 1,000 ya taunecūguwena.

⁶ Rū tataāēgū ya yīxema tūxira írūdagūxe erū Tupanaārū duūxūgū tixīgū. Rū ngēma Tupanaārū poxcu rū marū tāūtāma tūmacèx nixī. Rū tá Tu-

panaãrũ rũ Cristuarũ ngũxẽẽruũgũ tixĩgũ. Rũ 1,000 ya taunecũ tá Cristumaã ãẽxgacũgũ tixĩgũ.

ngoxo i Chataná rũ marũ nago nayarũchixe

⁷ Rũ ngẽxguma marũ nangupetũgu ya yima 1,000 ya taunecũ, rũ Chataná rũ tá ningẽx i ngẽma ínapoxcuxũwa.

⁸ Rũ nũma i Chataná rũ tá ínaxũxũ na yawomũxẽẽãxũcèx i guxũma i ñoma i naãnecũãx i duũxũgũ rũ Goga rũ Magoga na ngẽmagũxũ nangutaquẽxexẽẽxũcèx na Tupanaãrũ duũxũgũmaã nũgũ nadèixũcèx. Rũ ngẽma Chatanáãrũ churaragũ, rũ ñoma taxtũ i taxũãrũ naxnecũchicutẽxerũũ tá namuxũchi.

⁹ Rũ ngẽmaãcũ i Chatanáãrũ churaragũ rũ tá ñoma i naãneãrũ tagu ninguuchi. Rũ tá Tupanaãrũ duũxũgũxũ rũ yima ããne ya Tupana nũxũ ngechaxũne ya Yerucharéũxũ ínachoeguãchi. Natũrũ Tupana rũ daxũwa tá nanayixẽẽ ya üxũ, rũ yimamaã tá nixae i guxũma i ngẽma namaã rũxuwanũgũxũ.

¹⁰ Rũ ngẽma ngoxo i ngẽma duũxũgũxũ womũxẽẽxũ, rũ nawa tá natãe ya yima naxtaa ya üxũmaã iyaurachiũne ya azufremaã ixaxũne. Rũ yima nixĩ ya naxtaa ga marũ nawa nawoũne ga yema nũxĩraũxũ ga ngoxo rũ yema to ga ngoxo ga orearũ uruũneta ixĩxũ. Rũ yima naxtaawa tá nixĩ i guxũgutãma ngunecũ rũ chũtacũ ngũxũ yangegũxũ.

Ngẽma taxũ i tochicaxũ i cómũxũwa rũtocũpẽxewa nangugũ i duũxũgũ

¹¹ Rũ ñũxũchi nũxũ chadau ga wũxi ga taxũ ga tochicaxũ ga cómũxũ, rũ nũxũ chadau ga guma

nawa rütocü. Rû gumachaxwa nibuxmü ga ñoma ga naãne rû guxüma ga daxüwa nüxü idauxü, rû inayarütauxe.

¹² Rû nüxü chadau ga yema yuexü ga yaexü rû buexü ga Tupanapëxegu chigüxü. Rû ningena ga poperagü. Rû yexgumarüü ta ningena ga yema Tupanaärü popera i nagu yawügüxü i ngëma duüxügü i nüxü nangëxmaxü i maxü i taguma gúxü. Rû yema yuexü rû yexgumarüü ga ñuxãcü na namaxëxü ga wüxichigü rû yexgumarüü ga ñuxãcü na yema poperawa inaxümatüxürüüãcüma Tupana namaã nüxü nixu na ngextá tá naxïxü.

¹³ Rû yema yuexü ga taxtü ga taxüwa yexmagüxü rû wenaxârü ínarüdagü. Rû yema yuexü ga tauquewa yexmagüxü rû wenaxârü ínarüdagü. Rû yemaãcü ínarüdagü ga guxüma ga duüxügü ga yuexü. Rû guxüma ga yema yuexü rû Tupana nüxna nicachigü rû yexgumarüü ga ñuxãcü na namaxëxü ga wüxichigü rû namaã nüxü nixu na ngextá tá naxïxü.

¹⁴ Rû yemawena rû guma naxtaa ga üxümaã iyaurachiünewa nawoŷ ga yu guxüma ga norü poramaã. Rû guma naxtaa ga üxümaã iyaurachiüne, rû ngëma nixï i poxcu i taguma iyacuáxü i tûmacëx ixïxü ya yíxema tama Tupanaärü duüxügü ixïgüxe.

¹⁵ Rû guma naxtaa ga üxümaã iyaurachiünewa tawoŷ ga guxema ingeégaxe nawa i ngëma Tupanaärü popera i nagu tiwügüxü ya yíxema tüxü nangëxmaxë i maxü i taguma gúxü.

Ngexwacaxũxũ i ñoma i naãne rü guxũma i daxũwa ngẽxmaxũ

¹ Rü yemawena nüxũ chadau na nayexwacaxũxũ ga ñoma ga naãne rü guxũma ga tacü ga daxũwa yexmagüxũ. Yerü yema nüxĩra yexmagüxũ rü marü nangupetü, rü yema taxũ ga taxtũ rü marü nataxuma.

² Rü nüxũ chadau ga guma iãne ga mexũne ga Yerucharẽü ga yexwacaxũne ga daxũguxũ ga naãnewa Tupanaxũtawa írũxĩxũne ga guxũwama mexẽchine ñoma wüxi i pacü i ngẽxguma iyangĩxgu rü ngĩtecèx ngĩgü mexẽëxcürüü ixĩxũne.

³ Rü nüxũ chaxĩnü ga wüxi ga naga ga yema tochicaxũwa inaxũxũ ga tagaãcü ñaxũ:

“Tupana rü duũxũgütanüwa nangexma i ñuxmax. Rü natanüwa tá namaxëcha. Rü nümagü rü norü duũxũgü tá nixĩgü. Rü nüma ya Tupana rü natanüwa tá nangẽxmaëcha, na guxũguma norü Tupana yĩxücèx.

⁴ Rü nüma tá ínanapi i naxgüüëtü i guxũma i ngẽma duũxũgü. Rü marü täütáma texé tayu, rü texé tümaãrü ngechaũmaã taxaxu, rü texé ngúxũ tingegü. Erü guxũma i ngẽma ngúxũ rü marü inayarüxo”, ñanagürü.

⁵ Rü guma yema tochicaxũwa rütocü rü ñanagürü:

“Dücèx, choma rü chanangexwacaxũxẽe i guxũma i tacü i ngẽxmaxũ”, ñanagürü. Rü ñuxũchi ñanagürü ta:

“¡Naxümatü i ñaã ore! Erü ñaã ore rü aixcüma nixĩ, rü ñaã nixĩ i ore i mexũ na yaxõxũ”, ñanagürü.

⁶ Rü yemawena rü ñanagürü choxũ:

“Ñuxma rü marü ningu i guxüma. Rü chowa nixĩ ga inaxügüxü ga guxüma, rü nataxuma i tacü i chorü yexera ngëxmaëchaxü. Rü yíxema itawaxe, rü choma rü tá nangetanüácüma tüxü chaxaxëmare nawa i ngëma dexá i maxëëruü.

⁷ Rü yíxema nüxü rüporamaëgüxe i chixexü, rü tá tanayauxgü i guxüma i ngëma mexügü i nüxü chixuxü. Rü choma rü tá tümaärü Tupana chixĩ, rü tüma i chauxacügü.

⁸ Natürü ngëma muüëxü i nüxü rüxoexü na chowe naxixü, rü nawa tá nawoü ya yima naxtaa ya üxümaã iyaurachiüne ya azufremaã ixaxüne. Rü ngëxgumarüü ta i ngëma tama yaxögüxü, rü ngëma chixexü ügüxü, rü ngëma máëtagüxü, rü ngëma naĩ i ngemaã ipexü, rü ngëma iyuüxü rü ngöxwëxegüxü, rü ngëma tupananetachicünèxãxü icuèxüügüxü, rü ngëma idoratèëxgüxü, rü nawa tá nawoü ya yima naxtaa ya üxümaã iyaurachiüne ya azufremaã ixaxüne. Rü ngëma nixĩ i poxcu i taguma iyacuáxü i nüxü ínanguxëëxü i ngëma tama yaxögüácüma yuexü”, ñanagürü.

Yexwacaxüne ga Yerucharéüchiga

⁹ Rü yema 7 ga orearü ngeruügü ga nüxü yexmagüxü ga 7 ga copagü ga yema 7 ga poxcu ruümaã ixãcuxü, rü yematanüwa rü wüxi ga orearü ngeruü rü chauxcèx nixü, rü ñanagürü choxü:

“¡Nuã naxü! Rü tá cuxü nüxü chadauxëë i ngëma yaxögüxü i ñoma namèxrüü tá ixígüxü ya yima Tupana Nane ga pecaduarü ütanücèx yucü”, ñanagürü.

¹⁰ Rü yexguma yemaãcü Tupanaãë i Üünexü choxü ngoxetüxëëgu, rü yema orearü ngeruü

rü wüxi ga mèxpüne ga taxūnewa choxū naga. Rü choxū nüxū nadauxēē ga guma ãāne ya üünene ga Yerucharéū ga daxūguxū ga naānewa Tupanaxūtawa írūxīxūne.

¹¹ Rü guma ãāne rü Tupanaārü yauracüüxūmaã nangóone. Rü yema norü yauracüüxū ga guma ãāne rü ñoma wüxi ya nuta ya mexēchicürüū nixī. Rü ñoma nuta ya yasperüū nixī na yachipetüxū.

¹² Rü guma ãāne rü guxūwama ínapoxegu. Rü nataxüchi rü namáchanexüchi ga yema norü poxeguxū. Rü yema norü poxeguxū rü nüxū nayexma ga 12 ga norü ãāx. Rü wüxichigü ga yema ãāxwa nayexma ga wüxi ga Tupanaārü orearü ngerü. Rü wüxichigü ga yema ãāxwa nangoxéga ga wüxichigü ga yema 12 ga Acobu nane ga Yudíugü nawa ne íxū.

¹³ Rü tomaēxpüx ga norü ãāx rü napēxewaama nayexma, rü yema to ga tomaēxpüx rü norü toxwecüwawa nayexma, rü yema to ga tomaēxpüx rü norü tügü necüwawa nayexma, rü yema to ga tomaēxpüx rü naweama nayexma.

¹⁴ Rü guma ãāneārü poxeguxū, rü 12 ga nuta ga taxüchicüétüwa inaxügü. Rü wüxichigü ga guma nutagüwa nangoxéga ga wüxichigü ga norü ngüexügü ga guma Tupana Nane ga pecaduarü ütanücèx yucü.

¹⁵ Rü yema orearü ngerü ga chomaã idexaxū, rü nüxū nayexma ga wüxi ga norü ngugüxū ga uirumenèxānaxcèx na yemamaã nangugüāxücèx ga guma ãāne, rü norü ãāxgü, rü norü poxeguxügü.

¹⁶ Rü guma ãāne rü nawüxigumare ga guxücwawa. Rü norü mèx rü nawüxigumare namaã ga norü tatachinü. Rü yema orearü

ngeruű rű yema uirumenèxãmaã nanangugű ga guma ããne. Rű 2,200 kilómetru nixĩ ga norű mèx. Rű yexgumarűű ta 2,200 kilómetru nixĩ ga norű tatachinű. Rű 2,200 kilómetru ta nixĩ ga norű máchane.

¹⁷ Rű yemawena rű inanangu ga yema norű poxeguxű ga guma ããne. Rű 65 metru nixĩ ga norű máchane. Rű yemaãcű duűxűgűarű ngugűxűmaã nanangugű.

¹⁸ Rű yema norű poxeguxű ga guma ããne, rű nuta ga mexèchicű ga yaspénaxcèx nixĩ. Rű nümatama ga guma ããne rű uirunaxcèx nixĩ. Rű ñoma woruarűű niyauracűű.

¹⁹ Rű guma nutagű ga itacű ga norű poxeguxűpara ixĩgűcű, rű nagűxűraűcű ga nuta ga imexèchicűmaã nangèxãẽ. Rű guma nüxĩraűcű ga napara rű nuta ga yaspemaã nangèxãẽ. Rű guma norű taxre ga napara rű nuta ga safirumaã nangèxãẽ. Rű guma norű tomaèxpűx ga napara rű nuta ga ágatamaã nangèxãẽ. Rű guma norű ägűműcű ga napara rű nuta ga esmerádamaã nangèxãẽ.

²⁰ Rű guma norű wűximèèxpűx ga napara rű nuta ga onichemaã nangèxãẽ. Rű guma norű 6 ga napara rű nuta ga cornalínamaã nangèxãẽ. Rű guma norű 7 ga napara rű nuta ga crisólitumaã nangèxãẽ. Rű guma norű 8 ga napara rű nuta ga berilumaã nangèxãẽ. Rű guma norű 9 ga napara rű nuta ga topásiumaã nangèxãẽ. Rű guma norű 10 ga napara rű nuta ga crisoprásamaã nangèxãẽ. Rű guma norű 11 ga napara rű nuta ga yachítumaã nangèxãẽ. Rű guma norű 12 ga napara rű nuta ga amatístamaã nangèxãẽ.

²¹ Rŭ yema 12 ga norŭ iãx ga guma iãneãrŭ poxeguxŭ rŭ perlanaxcèx nixĩ. Rŭ wŭxichigŭ ga yema iãx rŭ wŭxitama ga perla nixĩ. Rŭ yema norŭ ítamŭ ga guma iãneãrŭ ngãxŭwa dapetŭxŭ, rŭ uiruxicanaxcèx nixĩ. Rŭ ñoma woruarŭŭ niyauracŭŭ.

²² Rŭ guma iãnewa rŭ taxúnema ga ngutaquẽepataxŭ ga ngextá Tupanaxŭ nawa yacuèxŭŭgŭnèxŭ chadau, yerŭ nŭmatama ga Tupana ya poracŭ rŭ Nane ga pecaduarŭ ũtanŭcèx yucŭ rŭ yéma nayexma na duŭxŭgŭ nŭxŭ icuèxŭŭgŭxŭcèx.

²³ Rŭ yima iãne rŭ taxucèxma ũèxcŭ rŭ tauemacŭ nŭxŭ nabaxi, erŭ Tupanaãrŭ ngóonèxŭtama nixĩ i nangóonèxèèxŭ. Rŭ yima Tupana Nane ga pecaduarŭ ũtanŭcèx yucŭ nixĩ ya norŭ omŭ ixĩcŭ.

²⁴ Rŭ ngẽma Tupanaãrŭ ngóonèxŭ i yima iãnèxŭ ngóonèxèèxŭ tá nixĩ i nangóonèxèèxŭ naxcèx i guxŭma i ñoma i naãnecŭãx i duŭxŭgŭ. Rŭ ngẽma tá nangugŭ i guxŭma i nachiŭãnegŭarŭ aẽxgacŭgŭ i yaxôgŭxŭ rŭ tá Tupanana nayana i norŭ mexŭgŭ.

²⁵ Rŭ norŭ iãxgŭ rŭ tagutáma narŭwãxtagŭ erŭ ngẽma rŭ guxŭguma nangunexecha rŭ taguma nachŭta.

²⁶ Rŭ ngẽma tá nanana i guxŭma i ñoma i naãneãrŭ mexŭgŭ.

²⁷ Natŭrŭ tagutáma ngẽxma naxŭcu i tacŭ i Tupanapẽxewa chixexŭ, rŭ bai ya texé ya chixexŭ úxe rŭ èxna idoratèxáxe. Rŭ yíxema Tupana Nane ga pecaduarŭ ũtanŭcèx yucŭarŭ poperawa ngoxégagŭxexicatátama tixŭgŭ ya ngẽxma chocuxe.

22

¹ Rŭ ñuxŭchi ga yema orearŭ ngeruŭ rŭ choxŭ

nüxü nadauxêê ga wüxi ga natü ga metacüchiüxü rü ichipetüchiüxü ga dexá ga maxêêruü. Rü yema tochicaxü ga nawa natogüxü ga Tupana rü Nane ga pecaduarü ütanücêx yucü, rü nawa nixĩ ga ne nadaxü ga yema natü.

² Rü guma ñãneärü ngãxüwa dapetüxü ga ítamüarü ngãxügu nida ga yema natü. Rü norü guxücutüwa narüxügü ga naïgü ga maxêêruü. Rü yema naïgü rü wüxicanatama naxo ga wüxichigü ga tauemacügu rü yemaãcü 12 êxpüxcüna naxo ga wüxi ga taunecügu. Rü naätügü ga yema naïgü, rü guxü i nachiüñanecüñax i duüxügü i yaxõgüxüärü taãxêêruü nixĩ.

³ Rü ngema rü nataxütáma i tacü i Tupana chixexü namaã naxuxuchixü. Rü yima ñãnewa tá nangêxma i norü tochicaxü ya Tupana rü Nane ga pecaduarü ütanücêx yucü. Rü norü duüxügü rü tá nüxü nicuèxüügü.

⁴ Rü ngêma norü duüxügü rü tá nachiwexüchixü nadaugü, rü tá naegamaã nixãegacatü.

⁵ Rü ngema rü tagutáma nachüta. Rü ngêma norü duüxügü, rü taxucêxtáma nanaxwêxe i daparina rü êxna üèxcü na nangóonexüçêx. Erü nümatama ya tórü Cori ya Tupana rü tá nüxü nabaxi. Rü nümagü i ngêma duüxügü rü guxügutáma wüxigu Tupanamaã ãêxgacügü nixĩgüecha.

Marü ningaica na wena núma naxüxü ya Ngechuchu ya Cristu

⁶ Rü ñuxüchi ga yema Tupanaärü orearü ngeruü rü ñanagürü choxü:

“Ñãã ore rü aixcüma ixĩxü nixĩ, rü ñãã nixĩ i ore i mexü na yaxõxü. Rü nüma ya tórü Cori ya Tupana

ga nuxcūma norū orearū uruūgūmaã nüxū ixucū ga tacū tá na ngupetūxū, rü nümatama nixī i ñuxma inamuãxū i norū orearū ngeruū i daxūcūãx na norū duūxūgūxū nüxū nadauxēēxūcèx na tacū tá paxa nangupetūxū”, ñanagürü.

⁷ Rū nüma ya tórü Cori ya Ngechuchu rü ñanagürü:

“Paxa tá íchangu. Rū tataãe ya yíxema naga ñnüxē i ngēma Tupanaärü ore i ñaã poperagu ümatūxū”, ñanagürü.

⁸ Rū chomatama i Cuáŭ rü nüxū chaxīnü rü nüxū chadau i guxūma i ngēma nüxū chixuxū. Rū yemaxū chaxīnüguwena rü nüxū chadèuxguwena, rü yema orearū ngeruū ga yemaxū choxū dauxēēxūpēxegu chacaxãpūxū na nüxū chicuèxūüxūcèx.

⁹ Natürü ga nüma rü ñanagürü choxū:

“¡Tãxū i ngēma cuyūxū! Erü choma rü ta Tupanaärü duūxū chixī, ngēxgumarūŭ i cuma rü cueneēgü i Tupanaärü orexū ixugūxū rü ngēma duūxūgü i naga ñnüxēxū i ngēma ore i ñaã poperagu ümatūxū. Rū name nixī i Tupanaxū quicuèxū”, ñanagürü.

¹⁰ Rū ñanagürü ta choxū:

“Tama name na icuyacúxū i ngēma Tupanaärü ore i ñaã poperagu ümatūxū, erü marü ningaica na yanguxū i ngēma ore.

¹¹ Natürü ngēma chixexū ügūxū, rü chixexū tá naxügüecha. Rū ngēma Tupanapēxewa chixri maxēxū, rü chixri tá namaxēēcha. Natürü yíxema mexū ügüxe, rü name nixī na mexū taxügüechaxū. Rū yíxema Tupanapēxewa ixüünexē, rü name nixī na Tupanapēxewa tixüüneēchaxū”, ñanagürü.

12 Rū ñanagürü ga Ngechuchu:

“Dücèx, paxa tá íchangu namaã i ngẽma ãmare i wüxichigüna tá chaxãxü ngëxgumarüü na ñuxãcü tanaxüxü i tümax.

13 Choma nixĩ i norü ügü i guxüma, rü chowa nixĩ i yacuáxü erü nataxuma i țacü i choweama üxü.

14 Rü tataãëgü ya guxãma ya yíxema yima pecaduarü ütanüçèx yucügüwa tügü iyauwgüchiruxe na Tupanapëxewa timexüçèx na yima ñãneärü ñãxwa tichocuxüçèx rü nüxü tangõxnetagüxüçèx i ngẽma norü o i ngẽma naĩ i maxëëruü.

15 Natürü täütáma yima ñãnewa nichocu i ngẽma tama yaxögüxü, rü ngẽma iyuüxü rü ngõxwëxegüxü, rü ngẽma naĩ i ngemaã ipegüxü, rü ngẽma máëtagüxü, rü ngẽma tupananetachicünëxãxü icuëxüügüxü. Rü ngëxgumarüü ta i ngẽma idorateëxgüxü i norü me ixixü na togüxü nawomüxëëgüxü, rü täütáma nawa nichocu ya yima ñãne.

16 Rü choma i Ngechuchu, rü guxãma i pema i yaxögüxütanüwa chanamu i chorü orearü ngerüü na pemaã nüxü yaxuxüçèx i guxüma i ngẽma chorü ore. Rü choma nixĩ i Dabítaa chiixü. Rü choma nixĩ ya yima woramacuri ya pëxmama poraãcü nangóonexëëcürüü chiixü”, ñanagürü.

17 Rü Tupanaãë i Üünexü rü guxüma i yaxögüxü, rü Ngechuchuxü ñanagürügü:

“¡Nuã naxü!” ñanagürügü. Rü yíxema nüxü ñnuxë i ñãã ore, rü:

“¡Nuã naxü!” ñatagügü. Rü yíxema itawáxe rü tüxü nachixégaxe, rü name nixĩ i nuã taxü rü

tüxũ nangetanüãcüma nawa taxaxe i ngẽma dexá i maxẽẽruũ.

¹⁸ Rũ guxãma ya yíxema irüxĩnũxẽ i ñãã Tupanaãrũ ore i ñãã poperagu ümatüxũ, rũ tümamaã nüxũ chixu rũ ngẽxguma chi texé íyatóxẽẽgu i ngẽma Tupanaãrũ ore i ñãã poperagu ümatüxũ, rũ Tupana rũ tá tümacèx nanayexeraxẽ i ngẽma poxcuruũgũ i ñãã poperawa nachiga naxümatüxũ.

¹⁹ Rũ ngẽxguma chi texé nüxũ üpetügu i wüxitama i ñãã Tupanaãrũ ore i ñãã poperagu ümatüxũ, rũ Tupana rũ tãütáma tüxũ nüxũ nangoxnetaxẽ i ngẽma norü o i ngẽma naĩ i maxẽẽruũ i ñãã poperawa nachiga naxümatüxũ. Rũ ngẽxgumarüũ tá ta tãütáma tüxũ nimucuchi nawa ya yima ñãne ya üünene i ñãã poperawa nachiga naxümatüne.

²⁰ Rũ yima nüxũ ixucü i ñãã ore, rũ ñanagürü:
 “Ngẽmããcü, paxa tá íchangu”, ñanagürü. Rũ ngẽmaãcü yĩ. Rũ choma i Cuáũ rũ ñacharügü:

“¡Nuã naxũ Pa Cori ya Ngechuchu!” ñacharügü.

²¹ Rũ chanaxwèxe i tórü Cori ya Ngechuchu ya Cristu poraãcü pexũ narüngüxẽ i guxãma i pemax. Rũ ngẽmaãcü yĩ.

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6